

**PETRI
POMPONATII
MANTUANI
TRACTATUS
DE...**

Pietro Pomponazzi



NAZIONALE

12

VITT. EMANUELE

BIBLIOTECA

24 B

12

12. 24. B. 12

PETRI POMPONATII
MANTVANI
TRACTATUS
DE
IMMORTALITATE
ANIMÆ.

M. D. XXXIV.




41



BIBLIOTHECA NAZIONALE
ROMANA
VITTORIO EMANUELE

P. POMPONATII
MANTVANI
TRACTATVS
DE
IMMORTALITATE
ANIMÆ.



PROOEMIUM

*Continens intentionem, seu libri
materiam & causam intentionis.*



RATER Hieronymus
Natalis, Ragusæus, or-
dinis Prædicatorum,
cum aduersa labora-
rem valetudine, sicuti
est vir humanissimus
nostrique amantissi-
mus, ad nos se frequentius recipiebat, cum-
que, quodam die, minus me vexari a mor-
bo, conspiceret, vultu adeo demisso sic
orsus est.

Charissime Præceptor, superioribus
A 3 die,

diebus cum primum de cœlo nobis exponeres, pervenissesque ad locum illum, in quo Aristoteles, ingenitum & incorruptibile conuerti, pluribus argumentationibus, contendit, ostendere, dixisti, Diui Thomæ Aquinatis positionem, de animorum immortalitate, quanquam, veram & in se firmissimam, nullo pacto ambigeres, Aristotelis tamen dictis minime consonare, censebas. Ea propter nisi tibi molestum esset, a te duo intelligere maxime desiderarem. Primum scilicet, quid, reuelationibus & miraculis semotis, persistendoque pure infra limites naturales, hac in re sentis, alterum vero quamnam sententiam Aristotelis in eadem materia fuisse, censes?

At ego, cum omnium ibi astantium idem maximum desiderium conspicerem (etenim multi aderant) sic tunc ipse respondi, Dilectissime Fili, vosque ceteri, etsi non parum petis, (altissimum enim huius negotium est, cum omnes fere illustres Philosophi in hoc laborarint) quoniam tamen nonnisi rem, quam possum, quid scilicet existimem, postules, facile etenim est hoc tibi aperire, immo, libenti animo tibi morem geram, cæterum vero, an ita se habeat res, ut existimo, peritiores consules. Rem igitur, Deo duce, aggrediar.

In quo ostenditur hominem esse ancipitis naturæ, mediumque inter mortalia & immortalia.

CAPVT I.

INitium autem considerationis nostræ hincsumendum, duxi, hominem scilicet non simplicis, sed multiplicis, non certæ, sed ancipitis, naturæ esse, mediumque inter mortalia & immortalia; collocari. hoc autem videre apertum est, si eius essentielles operationes, ex quibus essentia notificantur, inspexerimus. Eo etenim, quod vegetatiuæ & sensitiuæ opera exercet, quæ, vt 2 de anima, 2 de gener. anim. cap. 3, traditur, sine instrumento corporali caducoque exerceri non possunt, mortalitatem induit, eo autem, quod intelligit & vult, quæ operationes, vt per totum librum de anima, & 1 de part. anim. cap. 1 & 2, gener. anim. cap. 3, habetur, sine instrumento corporali exercentur, & separabilitatem, immaterialitatem & immortalitatem, arguunt, inter immortalia connumerandus est, ex quibus tota colligi potest conclusio, non simplicis scilicet naturæ esse, cum tres

animas, ut fere ita dixerim, includat, vegetatiuam videlicet, sensitiuam, & intellectiuam, ancipitemque naturam sibi vendicare, cum neque simpliciter mortalis, neque simpliciter immortalis, existat, verum utrumque naturam amplectatur. Quapropter bene enunciaverunt antiqui, cum ipsum inter æterna & temporalia statuerunt, ob eam causam, quod neque pure æternus, neque pure temporalis, sit, cum de vtraque natura participet, ipsique, in medio existenti, data est potestas, vtram velit, naturam induat. Quo factum est, ut tres modi hominum inueniantur. Quidam namque inter Deos connumerati sunt, licet perpauca, & hi sunt, qui, subiugatis vegetatiua & sensitiua, quasi toti rationales effecti sunt, quidam vero, ex toto neglecto intellectu, solisque vegetatiuæ & sensitiuæ incumbentes, quasi in bestias transmigrauerunt: & hoc fortassis voluit Apologus Pythagoreus, cum dixit, animas humanas in diuersas bestias transire, quidam vero puri homines nuncupati sunt, & hi sunt, qui mediocriter secundum virtutes morales vixerunt, non tamen ex toto intellectui incubuere, neque prorsus virtutibus corporeis vacauere. Horum tamen modorum vnusquisque magnam habet latitudinem, sicuti videre apertum est, huic etiam consonat, quod in psalmo dicitur, *minuisti eum paulo minus ab Angelis.* In

*In quo ponuntur modi, quibus dicta
multiplicitas humana natura
intelligi potest.*

CAPVT II.

Visa itaque multiplici ancipitique hominis natura, non ea quidem, quæ ex compositione materię & formę resultat, sed ea, quæ ex parte ipsius formę, seu animę, videndum restat, cum immortale & mortale opposita sint, quæ de eodem affirmari nequeunt, merito quis ambiget, quomodo fieri possit, ut hæc simul de anima humana dicantur. Etenim hoc videtur non leue. Quare vel vna & eadem natura statuetur, quæ simul mortalis & immortalis sit, aut altera & altera. Quod si secundum detur, hoc tribus modis intelligi poterit. Aut igitur secundum numerum hominum erit numerus mortalium & immortalium, utpote in Socrate erit vna immortalis, & vna, aut duæ, mortales, & sic de cæteris, sic, quod vnusquisque propriam mortalem & immortalem habeat, aut potius in omnibus hominibus vna tantum statuetur immortalis, secundum vnumquemque autem ho-

minem mortales sunt distributæ & multiplicatæ, an magis, e converso, immortalẽ multiplicatam, mortalem vero omnibus communem, ponemus. Si vero altera pars magis eligatur, videlicet, quod per vnã & eandem homo sit mortalis & immortalis, cum fieri non posse videatur, quod opposita de eodem dicantur, simpliciter fieri nequit, vt eadem sit mortalis & immortalis, verum vel simpliciter erit immortalis & secundum quid mortalis, aut potius, vice uersa, simpliciter mortalis, & secundum quid immortalis, an magis vtrumque secundum quid amplexa est, scilicet secundum quid mortalis, & secundum quid immortalis. His etenim tribus modis satis contradictio euitari poterit. Colligenti ergo sex modis istud imaginari poterit, veluti discurrenti & colligenti apparet.

In quo ponitur modus affirmans, animum immortalem esse vnum numero, mortalem vero esse multiplicatum, quem modum Themistius & Auerroes insecuti sunt.

CAPVT III.

EX istis igitur sex modis enumeratis quatuor acceperunt iudices, duo vero euauerunt. Nullus enim posuit, immateri-

terialem multiplicari, materialem vero esse vnum numero, & hoc rationabiliter, quoniam inimaginabile est, vnam rem corpoream esse in tot distinctis loco & subiecto, & maxime, si est corruptibilis. Similiter nullus posuit, eandem rem æqualiter esse mortalem & immortalem, sicut nihil æqualiter potest constitui ex duobus contrariis, sed semper oportet vnum alteri prædominari, vt ostenditur 1 de cælo, tex. comm. 7 & 2 de gener 47 & 10, metaph. 23. Sigillatim gitor de illis quatuor residuis.

Auerroes itaque, & vt existimo, ante eum Themistius, concordēs posuere, animam intellectiuam realiter distingui ab anima corruptibili, verum ipsam esse vnam numero in omnibus hominibus, mortalem verò multiplicatam.

Primi autem dicti ratio est, quoniam, cum viderunt, Aristotelem simpliciter probare, intellectum possibilem esse immixtum & immaterialem, & per consequens æternum, omniaque eius verba ad hoc tendere, vt inspicienti, libros de anima liquet, credideruntque, rationem Aristotelis in se veram esse, affirmauerunt simpliciter, intellectum esse immortalem. Cum autem vltius viderunt, animam sensitiuam & vegetatiuam de necessitate in suis officiis organo corporeo indigere, vt ex locis superius citatis apparet,

tale autem de necessitate corporeum &
 caducum est, concluderunt, talem animam
 simpliciter esse mortalem. Verum, cum
 fieri nequeat, ut eadem res simpliciter &
 absolute mortalis & immortalis sit, co-
 acti sunt ponere, immortalem a mortali
 realiter distingui. Themistius quoque in
 hanc sententiam trahere conatur Plato-
 nem, inducitque verba Platonis, in Ti-
 mæo, quæ manifeste videntur hoc præten-
 dere. Quod vero vnicus sit intellectus in
 omnibus hominibus, siue possibilis po-
 natur, patere potest ex eo, quoniam apud
 Peripateticos est celebrata propositio,
 multiplicationem indiuiduorum in ea-
 dem specie non posse esse, nisi per mate-
 riam quantam, ut dicitur 7 & 12 metaph.
 & 2 de anima. Quo autem modo soluan-
 tur dubitationes contra hunc modum,
 apparet, eorum libros & suorum secta-
 torum intuendo. Hic enim intendimus
 abbreviare, solumque referre, quæ neces-
 saria sunt.

*In quo dicta opinio Averrois im-
 pugnatur.*

CAPVT IV.

QUAMVIS hæc opinio tempestate no-
 stra sit multum celebrata, & fere ab
 omnibus pro constanti habeatur, eam esse

Ari-

Aristotelis, mihi tamen videtur, quod nedum in se sit falsissima, verum inintelligibilis, & monstrosa, & ab Aristotele prorsus aliena, immo, existimo, quod tanta fatuitas nunquam fuerit nedum credita, verum excogitata. Et primo quidem de eius falsitate nihil novi intendo adducere, sed tantum lectorem remittere ad ea, quæ Latinorum decus, Diuus Thomas Aquinas, & in libro proprio contra unitatem intellectus, & in 1 parte summæ, & l. 2 contra Gentiles, & in quæstionibus disputatis de anima, & in multis aliis locis, scribit. Etenim tam luculenter, tam subtiliter, aduersus hanc opinionem inuehitur, vt, sententia mea, nihil intactum, nullamque responsionem, quam quis pro Auerroe adducere potest, impugnatam relinquat. Totum enim impugnat, dissipat, & annihilat, nullumque Auerroistis refugium relictum est, nisi conuicia & maledicta in Diuinum & Sanctissimum virum, sed, quoad secundum, hæc pauca, quæ mihi plenam fidem faciunt, adducere, statui, videlicet, hoc alienum esse ab Aristotele, verum hoc esse figmentum, & monstrum, ab Auerroe confectum.

Primo, quoniam talis anima intellectiua, vel habet aliquam operationem, omnino independentem a corpore, tanquam a subiecto & obiecto, vel nullam. secundum dici non potest, cum sibi re-

pugnet & rationi, sibi quidem, quoniam, omm. 12 lib. 1 de anima, in fine, hæc dicit, & non intendit per hoc, id quod apparet ex hoc sermone superficie tenus, scilicet, quod intelligere non sit, nisi cum imaginatione. Tunc enim intellectus materialis erit generabilis & corruptibilis, sicut intelligit Alexander. Ex quibus liquet, quod intellectus, secundum Averroem, habet aliquam operationem, omnino independentem a corpore. Ratione etiam illud firmatur, quoniam intellectus non est forma constituta in esse per subiectum, ergo non dependens a subiecto in esse, ergo neque in operari, cum operatio sequatur esse. Verum, quod hoc Aristoteli non consonet, eiusque sententiæ contrarietur, satis patet, cum Aristoteles, in fine citati textus 12 lib. 1 de anima, dicat, intelligere, aut esse phantasia, aut non esse sine phantasia, &, quamvis ibi conditionaliter loquatur, tamen, 3 de anima, tex. 39, clarissime dicit, quod non est intelligere absque phantasmate, quod ex experimento comprobatur. Nullo igitur modo intellectus humanus, secundum Aristotelem, habet operationem, prorsus a corpore independentem, quod est oppositum concessi.

Ad hoc non video aliam responsionem, nisi, quod argumentum ostendit de intelligere humano, &, quatenus per eum in
tel-

tellectum homo dicitur intelligens. Sic enim verificatur, quod semper indiget phantasmate. In intellectione enim noua, & ante adeptionem, illud manifestum est, in intellectione vero æterna, siue in ipsa adeptione, illud etiam veritatem tenet, cum secundum ipsum intellectus possibilis disponatur ad susceptionem intellectus agentis, tanquam formæ per habitus speculatiuos, qui dependent in conseruari a virtute sensitiva, ut ipse dicit, 3 de anima, comm. 39. verum, si secundum se sumatur intellectus, nequaquam a phantasmate dependet.

Quamuis autem istud satis ingeniose dicatur, nihil tamen videtur proficere, quoniam, secundum communem definitionem animæ, anima est actus corporis physici organici, &c. Ergo anima intellectiua est actus corporis physici organici. Cum itaque secundum esse intellectus sit actus corporis physici organici, ergo & in omni suo opere dependebit ab organo, aut tanquam subiecto, aut tanquam obiecto. Nunquam ergo totaliter absolvetur ab organo.

Hinc forte dicitur, quod ita est de anima, sicut & de cæteris intelligentiis, Etenim Commentator ipse, comm. 19 lib. 3 de anima, ponit, ipsam esse vltimam intelligentiarum. Cæteræ autem intelligentiæ dupliciter considerari possunt, vno

vno modo in se, & non, vt actuant corpus
 coeleste, & sic non sunt animæ, habentque
 operationes nullo modo a corpore de-
 pendent, sicut intelligere & desiderare,
 alio autem modo considerari possunt, vt
 actuant corpora coelestia, & sic conuenit
 eis, esse animas, imo, & data definitio de
 animâ eis conuenit. Sicenim sunt actus
 corporis physici organici, licet satis
 æquiuoce illa definitio dicatur, vt ipse-
 met Commentator dicit, comm. 5. lib. 3
 de anima. Sunt enim corpora coelestia
 animalia, vt 8 de Physico auditu, 2 de
 coelo, & 12 metaph., ponit Aristoteles, li-
 cet satis æquiuoce, sicut & ipse com-
 mentator dicit, libro, de substantia or-
 bis. Quare & anima intellectiua duobus
 etiam modis considerari poterit. Vno
 enim modo, vt est infima intelligentia-
 rum, & non in ordine ad suam sphæram,
 scilicet hominem, & sic nullo modo de-
 pendet a corpore, neque in esse, neque in
 operari, quare neque vt sic est actus cor-
 poris physici organici. Alio autem modo
 considerari potest in ordine ad suam
 sphæram, & sic est actus corporis physici
 organici, quare non absoluitur a corpore
 vt sic, neque in esse, neque in operari.
 Quapropter, vt est forma hominis, sem-
 per indiget phantasmate in operari, sed
 non simpliciter, vt supra, & secundum
 istum modum solui potest vñtata dubi-
 ta-

tatio, scilicet, quomodo de anima intellectiua considerat naturalis, cum tamen, 1 de part. cap. 1, dicat, non spectare ad naturalem de intellectiua, cum sit mouens, non mota, &, reliqua, quæ ibi dicuntur, solvitur, inquam, quoniam, qua anima est, naturalis est, immo, secundum hanc considerationem considerantur intelligentiæ a naturali, qua vero anima humana est intellectus, metaphysici negotii est, sicut & ceteri intellectus superiores.

Sed reuera hæc responsio multipliciter videtur deficere, in primis quidem, quoniam si idem iudicium esset de anima humana, quod & de cæteris intelligentiis, quando, 2 metaph., Aristoteles tractationem facit de intelligentiis, & de humana anima pertractare debuisset, quod tamen minime fecit. Præterea, si idem est iudicium de humano intellectu, quod & de intelligentiis, cur igitur Aristoteles, 2 phys. tex. 26, ponit terminum considerationis naturalis animam humanam, quoniam, si intelligat Aristoteles, quantum ad quia est, falsum est. Etenim, quia est Dei & intelligentiarum naturalis, demonstrat, & per ipsum Commentatorem, lib. 1 de anima, comm. 2 & 12, metaph. comm. 36. Diuinus hæc accipis a naturali, si vero loquatur, quantum ad quid est, satis patet, secundum responsionem

nem datam, non pertinere ad naturalem, cum, ut sic, sit movens, non motum, immo, ut dicit responsio, hoc voluit Aristoteles, et de part. cap. citato. Amplius ridiculum videtur, dicere, animam intellectivam, quæ est una potentia, numero duos habere modos intelligendi, scilicet, & dependentem, & independentem a corpore. Sic enim duo esse videtur habere. Et enim intelligentia, etsi sit intellectus, & anima, & in suo intelligere non indiget corpore, in movendo autem indiget corpore, verum, localiter movere & intelligere, sunt operationes valde diversæ, in anima autem ponuntur intellectiones, quarum una dependet a corpore, altera vero est simpliciter absoluta, quod non videtur consonum rationi, cum, unius operationis respectu, unius & eiusdem non videatur esse, nisi unus, modus operandi. Præterea superfluum videtur & incredibile, quod unum numero habeat infinitas fere operationes respectu eiusdem obiecti simul, hoc autem sequitur secundum opinionem, quia ille intellectus intellectione æterna intelligit Deum, & intellectione nova tot habet intellectiones respectu Dei, quot homines Deum intelligunt. Hoc autem videtur esse purum figmentum, ut ex multis apparere potest, verum, si intelligentia intelligat sine corpore, non moneat au-
tem

tem localiter sine corpore, nullum sequitur, cum, intelligere & localiter mouere fiat operationes valde diuersorum generum, vnaque sit immanens, & altera transiens, cum totum oppositum contingat de anima intellectiva. Etenim ambæ & sunt intellectiones, & ambæ operationes immanentes.

Secundo ad principale, quia, si, secundum Aristotelem, anima intellectiva & vere immaterialis, vt fingit dictus Commentator, cum istud non sit per se notum, immo, maxime dubium, oportet, per aliquam euentiam manifestari, modo ad inseparabilitatem concludendam sufficit, secundum Aristotelem, quod sit vel virtus organica, vel, si non, organica saltem, quod sine obiecto corporali non possit exire in opus. Dicit enim, tex. 12, lib. 1, de anima, quod, siue intellectus sit phantasia, siue non sit, siue phantasia non contingit, ipsum separari, cum autem separabilitas inseparabilitati opponatur, disiunctiuæque affirmatiuæ contradicat copulatiuæ affirmatiuæ, factæ de partibus oppositis, si igitur ad inseparabilitatem sufficit alternatiuæ, vel esse in organo, tanquam in subiecto, vel ab ipso dependere, tanquam ab obiecto, igitur ad separabilitatem coniunctim requiritur, neque dependere ab organo, tanquam a subiecto, neque tanquam ab obiecto, saltem in aliqua

aliqua sui operatione, cum autem istud sit, de quo est quæstio, quomodo certificabit Auerroes, animam esse immortalem, præcipue, cum dicat Aristoteles, quod necesse est, intelligentem phantasmata speculari, & quilibet homo hoc experitur in seipso.

Hinc fortassis dicitur, quod illa ratio, 3 de anima, simpliciter probat, animam esse immaterialem, quia recipit omnes formas materiales, ex quo postea evidenter concluditur, quod habet operationem omnino independentem, cum operatio sequatur esse.

Sed hoc non videtur valere, quia illa ratio Aristotelis supponit, quod intellectus moueatur a corpore, cum dicat, intelligere esse, sicut sentire, & intellectum possibilem esse virtutem passiuam, infectiusque declarat, quod suum motuum est phantasma, sed, quod indiget phantasmate, est inseparabile a materia per dicta. igitur illa ratio magis probat, ipsum esse materialem, quam immaterialem.

Sed adhuc forte dicitur, quod ex eo, quod intellectus non indiget organo, tanquam subiecto, ideo est simpliciter immaterialis, quam rationem facit immediate Aristoteles post dictam. Verum istud non videtur proficere, quia vel sola illa conditio sufficit, vel requiritur alia, scilicet, quod non moueatur a corporeo.

fi.

si ambæ, fiat argumentum prius, si illa sola, destruitur iudicium Aristotelis, cum ponat, ambas esse requisitas.

Sed fortassis adhuc dicitur, quod reuera vna sola requisita est. Non indigere enim corpore tanquam subiecto, absolute infert, esse potentiam immaterialem, & e conuerso, quia tamen cum hoc, quod immaterialis est, & habeat aliquam operationem omnino independentem. Etenim, si immaterialis est, aliquam habet independentem & e contra, quoniam tamen, quod, ultra independentem ab obiecto, habeat & dependentem, ne fortasse aliquis existimaret, ex eo, quod habet aliquam dependentem, omnem habeat dependentem, ideo illud apposuit Aristoteles, scilicet, quod si intelligere non esset sine phantasia, sic, quod in omni operatione phantasia indigeret, indubitanter intellectus esset inseparabilis.

Sed istud non videtur posse stare. Primo, quoniam Aristoteles superflue apposuisset illam conditionem, cum altera sit sufficiens ad inferendam conclusionem, quod, nefas est, tanto ascribere Philosopho. Secundo, quia ex eo, quod intellectus in omni suo opere indiget phantasmate, infertur, quod ipse sit inseparabilis, hoc non potest esse, nisi, quia est organicus secundum positionem, dico autem organicus subiective. Secundum enim data con-

conuertuntur organicum subiectiue, & virtus materialis cognoscitiua, quare & non organicum subiectiue & immateriale. dicere ergo, indigere semper corpore, tanquam subiecto, etsi nihil nouum diceretur, cum dixit, si intelligere non est sine phantasia. Nam esse phantasia, & nunquam esse sine phantasia, simpliciter conuertuntur, & vnum declarat alterum. Eset ergo simile, ac si quis diceret, si Socrates non est homo, vel non est animal rationale, non est disciplinabilis, qui sermo quantum sit ridiculus & alienus a maiestate Aristotelis, iudicio aliorum relinquo. Amplius, quando aliquid habet duas causas veritatis, vna ablata, & altera remanente, non minus illud remanet, vt ex se notum est, cum ad veritatem disiunctiuæ sufficit, vnam partem esse veram, sed, intellectum inseparabilem esse a materia, verificatur, quoniam est phantasia, vel non est sine phantasia, vt patet i de anima. Remoto igitur, quod sit phantasia, non minus verificaretur, ipsum esse materialem, dummodo non esset sine phantasia, sed, secundum positionem, istud est falsum, quia impossibile est, secundum eam intellectum esse inseparabilem, & non esse phantasia, cum apud eam illa conuertantur. Ergo positio, ponens, organicum subiectiue & materiale conuerri, & pariter opposita eorum, scilicet, non
orga-

organicum, subiectiue & immateriale con-
uerſi, falſa eſt. Adhuc, quodocunque
alicui rei duo modi ſub diſiunctione aſſi-
gnantur, res illa indifferenter poteſt ab
altero illorum ſeparari, aut ſaltem ab
vno illorum, ipſa remanente, exempli
gratia, illiberalitas dupliciter contingit,
aut per auaritiam, aut per prodigalita-
tem, ideo & reperitur illiberalis auarus
ſine prodigalitate, & illiberalis prodigus
ſine auaritia. Si enim ſeparari non poſ-
ſent, non eſſent vtique duo modi illibera-
litate, ſed aut inuicem coinciderent, aut
ambo copulative, & non diſiunctiue, ne-
ceſſario concurrerent ad illiberalitatem.
Etenim, ſi nullus illiberalis eſſet, niſi ſimul
prodigus & auarus eſſet, non recte dice-
retur, ad illiberalitatem requiri prodiga-
litatem, vel auaritiam, ſed prodigalita-
tem & auaritiam coniunctas conſtituere
illiberalitatem. Si igitur ad inſeparabili-
tatem ſufficit, ipſam eſſe phantaſiam, vel
non ſine phantaſia, vel igitur ſtat, ipſam
eſſe inſeparabilem ſine altera earum con-
ditionum indifferenter, vel ſaltem deter-
minate. ſi primum, ergo ſtabit, quod in-
tellectus non ſit ſine phantaſmate, & ta-
men non ſit phantaſia, & per conſequens,
quod ſemper indigeat corpore, tanquam
obieto, & non tanquam ſubieto, quod
eſt contra conceſſa ab aduerſario, ſi ve-
ro detur ſecundum, videlicet, quod deter-



determinate & non indifferenter, cum fieri nequit, ut aliquo indigeat corpore, tanquam subiecto, & non tanquam obiecto. Ergo stabit, quod indigebit tanquam obiecto, & non, tanquam subiecto. Ergo idem, quod prius. Amplius, secundum positionem, intellectus habet aliquam operationem, omnimode independentem a corpore, cum istud dubium sit, debet per aliquod signum certificari, & non est aliud fingere, per quod certificari possit, nisi, quod ipse immaterialis est, verum, cum & istud non sit minus dubium, quam primum, demonstratione eget. Quæritur igitur de medio illo, an est, quod simul neque dependet a corpore, tanquam subiecto & obiecto, vel, quia solum non dependet a corpore, tanquam subiecto. primum dici non potest, tum, quia sic esset petitio principii, cum, intendentes probare, intellectum in aliquo sui opere non dependere a corpore. Assumimus, quod ipse immaterialis est, & probantes, ipsum esse immaterialem, accipimus, quod in aliquo opere non dependet a corpore, cum etiam, quia nullum est tale medium, in quo non sumatur, intellectum non dependere a corpore, ut ab obiecto. Prima enim demonstratio, 3 de anima, probat, intellectum esse immaterialem, quia recipit omnes formas materiales, modo, cum tale recipere consistit pati,

pati, vt ibidem dicit Aristoteles. Ergo mouebitur a re corporali, & sic indigebit tanquam obiecto. Secunda demonstratio est, quod species intelligibilis non recipitur in organo, sed in ipso intellectu. Ergo idem, quod prius, cum, recipere, sit pati. Oportet igitur dicere, alterum membrum, videlicet medium, esse, quia non indiget corpore, tanquam subiecto, licet tanquam obiecto. Quod si sic est, vnde igitur est, quod Aristoteles, attentum faciens auditorem, in prooemio de anima, dixit, necessarium esse, praeintelligere de suis operationibus, subditque, si intelligere est sine phantasia, vel non sine phantasia, non contingit, ipsam separari. Quare, ad concludendam separabilitatem, inseparabilitati oppositam, oportet, coniunctim sumere, neque esse phantasiam, & in aliquo sui opere non dependere a phantasia, &, per consequens, non dependere a corpore, tanquam subiecto, neque tanquam obiecto, saltem in aliquo sui opere, quod est oppositum concessi. Hoc iterum sic firmatur, per aduersarium, indigere corpore, tanquam subiecto, &, esse virtutem materiale, conuertuntur, sua etiam opposita conuertuntur, videlicet, non indigere corpore, vt subiecto, & esse virtutem immateriale. Nam, i post, si affirmatio est causa affirmationis, negatio negationis. Quid igitur Aristoteles,
ad

ad materialitatem concludendam, appositum, præter phantasiam, non esse sine phantasia. peccat enim per fallaciam non causæ vt causæ, quandoquidem præcisa causa materialitatis est, non indigere corpore, vt subiecto, quod & euidentissime sic iterum firmatur, quoniam ad immaterialitatem, præter non indigentiam corporis, vt subiecti, aut necesse est, ultra hoc, non indigere, in aliquo sui opere, determinato corpore, tanquam obiecto, aut illud non necesse est. Secundum dari non potest, per concessa, quoniam, non indigere corpore, tanquam subiecto, &, in aliquo determinato opere, non indigere, tanquam obiecto, conuertuntur. Quare, posito vno, ponitur reliquum. Restat igitur, vt immaterialitas copulatiue vtrumque exigit. Quare, cum materialitas immaterialitati contrarietur, ad ipsam materialitatem sufficit, indigere corpore, tanquam subiecto, vel corpore, tanquam obiecto. Vel igitur separabilia sunt ista, & sic non conuertentur, quod est contra concessa, vel inseparabilia erunt, & sic sub disiunctione non erunt assignanda, quod tamen facit Aristoteles. Vltima autem sequela patet, quia, quod disiunctiue enunciatur, alternatiue verificatur, & non copulatiue. Nam, 10 metaph. tex. 17, & Commentator, 3 de cælo, comm. 5, 9, & Boëtius, lib. de syllogismo hypothetico, dicunt, interrogationem

gationem & disiunctiuam veram & ridiculam esse, in quam omnes partes verificantur, & ultra tunc copulatiuæ affirmatiuæ contradiceret copulatiua facta de partibus oppositis, & non disiunctiua, quod apertissime falsum est. Quapropter, ni fallor, Commentator, D. Thomas, & quicumque sentit, Aristotelem censere, humanum intellectum vere esse immortalem, longe a vero distat. Præterea mirum est, quod Aristoteles posuerit, intellectum aliquando intelligere, sine phantasmate, & tamen in omnibus locis dicat, quod non est intelligere sine phantasmate. Non enim debuisset tam absolute proferre.

Tertio ad principale, quoniam, secundum Commentatorem, oportet, ponere felicitatem humanam in copulatione intellectus agentis cum possibili, sicut ipse, lib. 3 de anima, comm. 36, manifeste ostendit. Sed quam vanum sit hoc & Aristoteli dissonum, non difficile est, videre. Vanum quidem, quia, in quantum tradunt historiarum, nullus, usque ad hæc tempora, inuentus, & sic finis hominis irritus est, cum a nullo attingatur, immo, a nullo attingi potest, cum media ordinata ad illum finem haberi non possint. Impossibile est enim, aliquem hominem scire omnia, ut dicit Plato, lib. 10 de Republica, neque etiam speculabilia, immo, nulla scientia perfecte ha-

B

bita

bita est vsque ad præsentem diem, vt experimento patet. Quod etiam sit contra Aristotelem, manifestum est, quoniam, lib. Ethic., vbi determinat de vltimo fine hominis in eo, quod homo ponit ipsum in habitu sapientiali, neque quis dicere potest, librum illum non fuisse perfectum, cum manifeste, in fine libri illius, & epilogat, & se ad librum politicorum continuat. Quare vehementer non possum non mirari, cum ascribat Aristoteli hanc vnitatem intellectus, quandoquidem in nullo loco hoc ab eo ponatur, verum, 2 phys. tex. 26, vbi de anima humana mentionem facit, dicit, eas esse multiplicatas. Dicit enim sic, vsquequo. Cuius enim causa vnumquodque, & circa hæc, quæ sunt separatae species in materia. Homo enim hominem generat ex materia, & sol. vnde manifestum est, quod non vnâ solum, sed multas, posuit. Aliud etiam est de illa copulatione, cum neque alius repertus est talis, neque Aristoteles aliquid dixerit. Quare mihi videtur, cum hoc, quod est figmentum in se, sit etiam contra Aristotelem.

In quo ponitur alter modus, asserens, intellectum realiter distingui a sensitivo, verum numeratum ad numerationem sensitiui.

CAPVT V.

ABiecta igitur priori opinione, tanquam intelligibili, est alter modus de enumeratis, conueniens cum primo, quantum ad illud, quod intellectiuum realiter distinguitur a sensitivo, quandoquidem contradictoria vere de eodem dici non possunt, verum in altero ab illo distat. Nam, secundum numerum sensitiuorum, ponit numerum intellectiuorum. Socrates enim distinguitur a Platone, vt hic homo ab illo homine, non est autem hic homo, nisi per intellectum, vt etiam ipse Averroes fatetur, 3 de anima, comm. 1. Quare alter est intellectus Socratis ab intellectu Platonis. Etenim, si vnus amborum esset intellectus, amborum esset idem esse & operari, sed, quid stultius excogitari potest? verum & hi sic conformes inter seiplos diuersificati sunt. Quidam enim ipsorum posuerunt, animam magis se habere ad hominem, vt

B 2

motor

motor ad motum, quam, vt forma ad materiam. Et hæc videtur fuisse mens Platonis, in primo Alcibiadis, dicentis, hominem esse animam, vtentem corpore, cui videntur consonare verba Aristotelis, 9 Ethic. dicentis, hominem esse intellectum. Alii autem oppositum asseruere, dicentes, animam se habere ad hominem, vt forma ad materiam, & non solum, vt motor ad motum, veriusque dicendum, hominem esse compositum ex anima & corpore, quam, ipsum esse animam vtentem corpore. Cetera autem, quæ ab eis adducuntur, nostro proposito non sunt necessaria.

In quo prædicta opinio impugnatur.

CAPVT VI

Hic autem modus, secundum vtrumque membrorum, a Diuo Thoma, in prima parte summæ, & in multis aliis locis impugnatur, & mea sententia, abunde & manifeste. Si enim homo non componeretur ex anima intellectiua & corpore, velut ex materia & forma, sed ex motore & moto, tunc anima & corpus non maiorem haberent unitatem, quam boues &

& plaustrum, multaue alia incommoda sequuntur, quæ ab eo adducuntur. Ponere autem pluralitatem formarum substantialium in eodem composito, ut asserit secundum membrum, hoc ab Aristotele, & a multis Peripateticis videtur alienum. Verum duo adducam, per quæ omnes superiores modi mihi videntur & a veritate, & ab Aristotele, remoti.

Primo quidem hoc videtur experimento contradicere. Ego enim, qui hæc scribo, multis cruciatibus corporis angustor, quod opus est sensitivæ, idemque ego, qui crucior, discuro per causas medicinales, ut refellam hos cruciatus, quod, nisi per intellectum, fieri non potest. Si igitur altera esset essentia, qua sentio, & qua intelligo, quo igitur modo fieri posset, ut idem, qui sentio, sim ille, qui intelligo. Sic etenim dicere possemus, quod duo homines, simul coniuncti, sic mutuas habent cognitiones, quod ridiculum est. Quod autem huiusmodi opinio sit ab Aristotele remota, non difficile est, videre. Etenim, 2 de anima, ponit vegetativum in sensitivo, veluti trigonum in tetragono, sed, manifestum est, trigonum in tetragono non esse tanquam rem realiter ab eo distinctam, scilicet, quod est trigonum in potentia, est actu tetragonum. Quare, cum, per Aristotelem, eodem modo in mortalibus se habeat sensitivum ad intelle-

aiuum, sensitium non erit res distincta ab intellectiuo. Quapropter mihi videtur, quod & primus modus Auerrois, & isti duo, a vero, & ab Aristotele, dissonent.

CAPVT VII.

In quo ponitur modus, affirmans, mortale & immortale esse idem re in homine, verum etiam illam simpliciter esse immortalem, secundum quid vero mortalem.

CVM itaque vniuersaliter reiectus sit modus, qui, intellectiuum & sensitium in homine distingui realiter, existimet, reliquum est, vt intellectiuum & sensitium in homine sint idem, &, licet tribus modis, vt retro dictum est, hoc intelligi possit, duo tamen tantum sunt rationales.

Vnus igitur erat, quod immortale esset simpliciter in homine, mortale vero secundum quid, &, quamuis, secundum naturam diuisionis, modus iste in duos posset diuidi, scilicet, aut vnum numero in omnibus hominibus, aut multiplicatum ad numerum hominum, quia tamen nullus posuit

fuit primum modum, ideo relinquemus, sed tantum de secundo sermonem habebimus, quem etsi multi præclarissimi viri secuti sunt, quia tamen mihi videtur, quod D. Thomas copiosius & magis lucide ipsum posuit, ideo eius dicta solum referam, utque ordinate intelligatur, eius opinionem in quinque dictis colligam.

Primum itaque est, quod intellectuum & sensitivum in homine sint idem res.

Secundum, quod tale vere & simpliciter est immortale, secundum quid vero mortale.

Tertium, quod talis anima vere est forma hominis, & non solum, ut motor.

Quartum, quod eadem anima est numerata ad numerationem Individuorum.

Quintum, quod huiusmodi anima incipit esse cum corpore, verum, quod venit de foris, atque a solo Deo producit, non quidem per generationem, sed per creationem, hæc tamen non desinit esse cum corpore, verum, a parte post, est perpetua.

Primum horum satis ex superioribus manifestum est, tum, quia plures formæ substantiales non possunt esse in eodem subiecto, tum, quia eadem videtur essentia, quæ intelligit, & sentit, tum, quia sensitivum in moralibus est in intellectu, sicut trigonum in tetragono.

Secundum vero, in quo vis omnis consistit, videlicet quod tale vere est immortale, secundum quid tamen mortale, multipliciter declaratur. Primo, per rationem Aristotelis, 3 de anima, quoniam talis anima est receptiva omnium formarum materialium, quod autem est eiusmodi, non potest esse materiale, sicut ibidem Aristoteles declarat, cum recipiens debeat esse denudatum a natura rei receptæ, & est etiam propositio concessa a Platone, in Timæo, atque, ut dicit Auctores, 2 de anima, vniuersaliter verificatur in actione reali & spiritali. Oculus enim receptivus specierum coloris debet esse abscolor, & sic vniuersaliter de aliis sensibus. Secundo, quoniam, si intellectus esset materialis forma, recepta in eo esset intellecta in potentia, & sic aut non cognosceret, aut tantum particulariter cognosceret. Tertio, quia sic esset virtus organica, quare esset determinata ad certum genus entium, vel saltem ad modum singularem, quare vel non omnia cognosceret, vel non cognosceret modo vniuersali. A signo etiam hoc euidenter probatur. Nam modus appetendi naturaliter sequitur modum cognoscendi, intellectus autem vniuersale apprehendit, quod est æternum, quare & voluntas æternum desiderabit, tale autem desiderium naturale est, cum omnes voluntates hoc appetant,
na-

naturalis autem appetitus frustrari non potest, cum, 1 de cœlo, Deus & natura nihil agant frustra, quare conuincitur, intellectum esse simpliciter immortalem. Verba etiam Aristotelis sunt adeo lucida pro hac parte, ut interprete non indigeant, cum, 1, 2 & 3, de anima, ponat, intellectum esse separatum, & nullius corporis actum, in parte quoque, qua agitur de intellectu agente, dicit, quod intellectus agens vere est immaterialis, quia possibilis est huiusmodi, & agens præstantius est patiente. Idem quoque, 1 de part. cap. 1, & 2 de gener. anim. cap. 3, affirmat. Quod vero huiusmodi anima, secundum quid, mortalis sit, ex duobus manifestari potest. Primo, quia hæc intellectiua, & sensitiua, & vegetatiua, est, ut ex primo dicto liquet, verum sensitium & vegetatiuum, si ab intellectiuo separata sint, corruptibilia sunt. Quare non secundum se intellectiuum mortale est, sed, quia gradum continet, qui, solitarie sumptus, mortalis est. Secundo, quia anima humana opera sensitiuæ & vegetatiuæ non exercet, nisi caduco instrumento. Non igitur in se mortalis est, sed ratione talis operis & instrumenti.

Tertium dictum, scilicet, quod sit forma hominis, patet ex vniuersali definitione animæ, cum sit actus corporis physici, &c. Atque principium, quo intelligimus, ut

parte ibi demonstrat Aristoteles.

Quartum vero sequitur ex tertio. Nam, si anima intellectiva est forma, qua homo est homo, si vnica in omnibus hominibus esset, omnium hominum idem esset esse & operari, veluti contra Commentatorem monstratum est. Aristoteles etiam, 2 phys. tex. 26, expresse ponit eas in numero plurali, quemadmodum retro dictum est.

Quintum autem, videlicet, quod ipsa sit facta, patet, tum ex 2 phys. tex. 26, cum sol & homo generent hominem, tum, quia per tertium dictum est, forma, qua homo est homo, sed, 12 metaph. tex. 17, forma simul incipit esse cum eo, cuius est forma, tum ex 2 de gener. anim. cap. 3, vbi dicit, solum intellectum venire de foris. Quod vero non per generationem fiat, ex eo patet, quod per generationem producitur, materiale & caducum est. At, iam demonstratum est in secundo dicto, ipsam esse immaterialem & incorruptibilem. Quod etiam a Deo solo fiat, patet, quoniam, cum non sit per generationem, ergo per creationem. Verum, solum Deum creare, alibi demonstratum est. Hoc etiam per illud, 2 de gener. anim., patere potest. Dicitur enim ibi, solus igitur intellectus diuinus & immortalis existit. Quod autem post mortem remaneat, cum sit immortalis, manifestum est, ex dicto quo-

quoque Aristotelis, 12 metaph. tex. 17, liquet, cum dicat, nihil prohibere, intellectum post mortem remanere. Sicque tota positio clara habetur.

CAPVT VIII.

In quo mouentur dubitationes circa prædictum modum.

DE veritate quidem huius positionis apud me nulla prorsus est ambiguitas, cum Scriptura canonica, quæ cuilibet rationi & experimento humano præferenda est, cum a Deo data sit, hanc positionem sanciat, sed, quod apud me vertitur in dubium, est, an ista dicta excedant limites naturales, sic, quod aliquid vel creditum, vel reuelatum, præsupponant, & conformia sint dictis Aristotelis, sicut ipse Diuus Thomas enuntiat. Verum, cum tanti Doctoris autoritas apud me summa est, nedum in diuinis, verum in ipsa Aristotelis via, non ausim contra eum aliquid affirmare, sed tantum, quod dicam per modum dubitantis, & non assertentis ponam, fortassisque ab eius doctissimis sectatoribus veritas aperietur. In primo igitur eius dicto non ambigo,

scilicet, quod re in homine idem sit sensifitium & intellectiium, sed cetera quatuor sunt mihi valde ambigua.

Primo quidem, quod talis essentia, secundum se & vere, immortalis sit, sed, improprie & secundum quid, mortalis, primo quidem, quoniam, consimilibus rationibus, quibus hanc probat, opposita, probari potest. Ex eo namque, quod talis essentia formas omnes materiales recipit, quia recepta in ea sunt actu intellecta, quod non vitur organo corporeo, quod æternitatem & superna affectat, ideo concludebatur, quod ipsa sit immortalis, sed pariter, cum ipsa materialiter operetur, vt vegetatiua, non omnes formas recipit, vt sensitiua, & eadem organo corporeo vitur, temporalia & caduca affectat, probabitur, quod ipsa vere & simpliciter sit mortalis, verum ex ea parte, qua intelligit secundum quid, erit immortalis, tum, quia intellectus, non coniunctus materiæ, est incorruptibilis, sed, materiæ coniunctus, est corruptibilis, tum, quia in tali opere non fungitur instrumento corporali, sicut etiam ipse dicit, quod taliter est per accidens, & secundum quid materialis. Non enim maior ratio de vno, quam de altero, videtur.

Secundo, quia, cum in ista essentia sint quædam, quæ dant, ipsam esse mortalem, & quædam immortalem, cum multo
plura

plura promoueat ad mortalitatem, quam ad immortalitatem, &, 1 & 6 phys. a superabundanti fit denominatio, magis pronuntianda est mortalis, quam immortalis, & nedum pronuntianda, verum & hoc erit, ex parte rei. Assumptum autem declaratur. Nam, si in homine numerum potentiarum consideremus, duas tantum inuenimus, quæ attestantur super immortalitatem, scilicet, intellectum & voluntatem, innumeras vero tum sensitiuæ, tum vegetatiuæ, quæ omnes attestantur super mortalitatem. Amplius, si climata habitabilia conspexerimus, multo plures homines assimilantur feris, quam hominibus, interque climata habitabilia perrarissimos inuenies, qui rationales sunt, inter quoque rationales, si considerabimus, hi simpliciter rationales nuncupari non possunt, verum appellati sunt rationales, in comparatione ad alios maxime bestiales, sicut fertur de mulieribus, quod nulla est sapiens, nisi in comparatione ad alias maxime fatuas. Amplius, si ipsam intellectiōnem inspexeris, maxime eam, quæ de Diis est, quid de Diis? immo, de ipsis naturalibus, & quæ subiacent sensui, adeo obscura, adeoque debilis, est, ut verius utraque ignorantia, scilicet negationis & dispositionis, nuncupanda sit, quam cognitio. Adde, quantum modicum temporis apponant circa intellectum, & quam plurimum

munum circa alias potentias, quo fit, ut vere huiusmodi essentia corporalis & corruptibilis sit, vixque sit umbra intellectus. hæc etiam videtur esse causa, cur, ex tot mille hominibus, vix unus studiosus reperiatur, & deditus intellectuali. causa quidem naturalis. nam semper sit fuit, licet secundum magis & minus. causa, inquam, est, quia natura homo plus sensualis, quam immortalis, existit, quod etiam apparet, cum multi in definitione hominis posuerunt mortale pro differentia. si, inquam, hæc considerabis, magis opposita pars videbitur vero consona, quam illa D. Thoma.

Tertio contra eandem arguitur, quia, animam esse immortalem, non est per se notum, quaeritur igitur, sicut dicebatur, contra Auerroem, per quam evidentiam hoc cognoscitur? vel igitur ex eo, quod in suo opere non indiget organo, tanquam subiecto, precise; vel cum alio addito. primum dici non potest, per ipsum Aristotelem, 1 de anima, tex. 12. Nam ad inferendam inseparabilitatem sufficit alternative, vel, quod sua operatio sit in subiecto, vel, quod in omni sua operatione indigeat corpore, tanquam obiecto, cum dicat. si igitur, intelligere, aut est phantasia, aut non est sine phantasia, non contingit, ipsum separari. ergo ad separabilitatem ambæ conditiones requiruntur, quia

quia copulatiua affirmatiua opponitur disiunctiue, factæ ex partibus oppositis. Ad sciendum ergo, animam esse separabilem, oportet, quod neque indigeat corpore, tanquam subiecto, neque, tanquam obiecto, saltem in aliqua sui operatione. sed, quomodo hoc sciri potest, cum & Aristoteles dicat, necesse est, intelligentem phantasma aliquod speculari, & experimur, quoniam semper indigemus phantasmatibus, vt unusquisque experitur in se ipso, læsio organorum demonstrat, & omnia, quæ adducta sunt contra Commentatorem de immortalitate animæ, sunt & contra hanc opinionem, cum in hoc conueniant, licet in ceteris differant.

Quarto sic arguitur, si anima humana in omni suo opere dependet ab organo, ipsa est inseparabilis & materialis. sed in omni suo opere dependet ab organo, ergo ipsa materialis est. maior patet, idem anima, dicente Aristotele, si, intelligere, est phantasia, aut non sine phantasia, non contingit, ipsam separari. minor autem patet ex definitione vniuersali animæ, scilicet, est actus corporis physici organici.

Sed hinc forte dicitur, quod anima humana, quantum ad intellectum, non est actus corporis organici, cum intellectus nullius corporis sit actus, sed solum,
quan-

quantum ad opera sensitivæ & vegetativæ.

Verum, id videtur non posse stare, in primis, quia sic anima intellectiva non esset anima, cum, ut sic, non esset actus corporis physici organici, quod est contra Aristotelem, ponentem, illam esse definitionem communem omni animæ, immo, per ipsum Thomam, dictam univoce de omnibus animabus. Secundo, quia, si anima intellectiva indigeret organo pro ipso sentire, quamdiu igitur anima esset, ipsa sentiret, quod manifeste falsum apparet. Patet autem consequentia, quia, stante definito, stant & ea, quæ sunt in definitione. Tertio, quoniam, per ipsum Thomam, in prima parte, & in secundo contra Gentiles, ideo intelligentiæ non sunt formæ corporum cœlestium, quoniam, si sic essent, maxime indigerent corpore pro intellectione, sicuti anima humana. Ergo, si anima est actus corporis organici, quantum ad sensationem, hoc est, pro sua intellectione, ergo in omni suo intelligere indiget phantasia, sed, si sic est, ipsa est materialis, ergo anima intellectiva est materialis.

Sed hinc forte dicitur, quod non oportet animam intellectivam actu semper dependere ab organo, quamvis organum ponatur in eius definitione, sed sufficit, quod aptitudine, sicut, moveri sursum, et si
defi-

definitio lenis, quantumcunque leue non semper moueatur sursum, sed sufficit, quod moueatur, vel possit moueri.

Sed hæc responsio multipliciter videtur deficere. Primo, quia, si sola aptitudo sufficeret in definitionibus, tunc dici posset, quod aliquid esset homo, & tamen actu non esset animal rationale. sufficeret enim, secundum responsionem, quod esset aptitudine. Secundo, quoniam diceretur, quod si anima aptitudinaliter dependet a phantasia, non minus ipsa erit inseparabilis & materialis, quamuis semper actu non dependeat.

Ad hæc forte dicitur, quod illa non est definitio vera, sed quædam descriptio, seu notificatio. Ad secundum dicitur, quod ad inseparabilitatem non sufficit, dependere a corpore secundum aptitudinem, quoniam, separata existens & immaterialis, potest de facto a corpore dependere, si vero actu semper dependeret, sic, quod nunquam sine corpore posset existere, vtique esset materialis.

Sed nullum istorum dictorum videtur conueniens. Primum quidem, quoniam omnes dicunt, illas duas definitiones datas, de anima esse datas, vnâ, per causam formalem, & alteram, per materialem, & per vnâ demonstrari alteram. Secundum etiam dictum in pluribus videtur deficere. Primo quidem, quoniam, si ani-
ma

ma humana duos habet modos intelligendi, vnum per phantasma, alterum vero sine phantasmate, videtur multum irrationabile, quod substantia immaterialis moueatur a re materiali, nam quantumcumque immateriale in materiale agat, non videtur tamen actionem conuerti. quare & etiam apud Theologos dubitatio orta est, quomodo animæ cruciari possint ab igne corporeo. Secundo, quia, si anima separata habet habitudinem ad ipsum corpus, vel ergo reunitur, vel non. si primum, tunc oportet redire, ad opinionem Democriti, ponentis resurrectionem, vel ad Pythagoram, ponentem transmigrationem animarum in diuersa animalia, quod in erratis est impugnatum pro qualibet parte. si vero detur secundum, tunc est contra ordinem naturæ. Nam, 8 phys. tex. 15, Aristoteles impugnat Anaxagoram, ponentem, mundum non fuisse per infinitum tempus, & postea incepisse. Natura enim vel vno modo procedit, vel pluribus, quod si pluribus, ordinate tamen procedit, sed finiti ad infinitum nullus est ordo, neque proportio, quare, si, finito tempore, anima est coniuncta corpori, infinito autem separata, non stabit ordo naturæ. Tertio, quia tam diuersi modi essendi, scilicet, coniuncta & separata, tamque diuersi modi operandi, scilicet, per phantasma, & sine phantasmate,

mate, videntur arguere diuersitatem essentia. Nam, hoc modo sublato, nulla restat via probandi diuersitatem specificam inter aliqua. Etenim, 6 de hist. anim. ca. 24, dicit Aristoteles, mulas, quæ in Syria pariunt, quanquam valde similes sint nostris, vt vix discerni possint, non tamen esse eiusdem generis, propter tam diuersum modum generationis, videturque, per totum librum de animalibus, asserere, quod genita ex putredine, & ex semine, non sint eiusdem rationis, sicuti etiam affirmat Auerroes, idemque Auerroes, in fine de somno & vigilia, dicit, quod, si qui essent homines, qui non eodem modo cognoscerent, sicut nos, non essent eiusdem generis nobiscum. Alterum etiam dictum, videlicet, quod, si anima semper esset coniuncta phantasmati, esset materialis, non videtur bene dictum, quoniam, sicuti, per certum tempus esse coniunctum, non tollit immaterialitatem, ita neque, esse semper coniunctum, sicut dicit Philosophus, 1 Ethic., contra Platonem, diuturnitatem temporis non auferre speciem, quod confirmatur, quoniam intelligentia, in mouendo orbem, dependet semper a corpore, & tamen ipsa, sic dependens, immaterialis est, quare & intellectus, supposito, quod semper esset coniunctus corpori, non tamen sequitur, ipsum esse materiale. Quod si forte veri-

veritatem continere dicitur de intelligentia, quoniam corpus suum æternum est, at humanus intellectus corpus habet caducum, quare vel, corrupto corpore, ipse non esset, quod positioni repugnat, vel, si esset, sine opere esset, cum, sine phantasmate, per positionem, intelligere non posset, & sic otiaaretur. Sed istud dictum non videtur rationabiliter dictum, primo, quoniam non videtur illud sequi. Licet enim intellectus separatus non moveretur a phantasia iam corrupta, quid prohiberet, ipsum moveri a phantasias existentibus, quandoquidem sunt omnes eiusdem rationis, & ipse non videtur prohiberi ex loci distantia, cum non sit in loco, & eo præsertim, cum multi Theologi & grauissimi affirmant, & Angelos, & animas separatas, moueri ab istis inferioribus. Deinde illud, ad quod deducitur, non uidetur inconueniens, scilicet in separatione otiaari, quoniam, cum duo opposita insunt naturaliter alicui, non oportet, quod in omni tempore utrumque insit, immo, illud impossibile est, sicuti somnus & vigilia naturaliter insunt animali, & vigilia, exempli gratia, conuenit in die, somnus vero in nocte, quare anima coniuncta intelliget, separata vero otiaabitur. Quod si dicitur inconuenire, paucissimo tempore operari, & infinito otiaari, verum hæc responsio semet ipsam interimit, Nam,

h,

si, infinito tempore separata, intelligit, & tunc sine phantasmate, paucissimo autem tempore cum phantasmate, utique naturalius erit sibi, intelligere sine phantasmate, quam, cum phantasmate. Quare non conuenienter, in definitione animæ, ponitur actus corporis physici organici, &c.

Quinto, quia talis essentia vere est sensitua & uegetatiua. Vel igitur, post separationem, habet potentias, quibus exercere possit sua opera, vel non. si secundum, videtur contra naturam, quod æterno tempore sit manca & totaliter priuata, nisi recurratur ad resurrectionem Democriti, vel ad fabulas Pythagoreas, si autem habet, cum careat organis, quibus fungitur proprio opere, sequitur iterum, quod illæ potentiaæ sint vanæ, quod minime concederet Aristoteles.

Sexto, quod verius talis anima dicatur, secundum quid, immaterialis & immortalis, modo superius exposito, patet per ipsum Philosophum, 3 de anima, ca. de intellectu agente. Ibi enim, cum dixisset, utrumque intellectum esse separatum & immortalem, dixit postea, sed hic, scilicet intellectus agens, vere est, qui immortalis est & semper intelligens, ille vero, scilicet possibilis, non, cum quandoque intelligat & quandoque non intelligat. Corruptitur enim, quodam interius corrupto, quod est, quia ipse est coniunctus
ma-

materiæ, quare ad corruptionem sensitivæ corrumpitur, erit igitur re corruptibilis, sed, secundum quid, incorruptibilis, quoniam intellectus, qui non est coniunctus materiæ, est incorruptibilis. Hæc itaque mihi ambiguitatem inferunt, quoad secundum dictum.

Tertium dictum est, quod talis anima est vere forma hominis, & non tantum, ut motor. Huic quidem dicto ego consentio, si ponitur materialis, veruntamen, si ponitur immaterialis, ut ipse dicit, non videtur esse notum. Oportet enim talem essentiam esse hoc aliquid & per se stans. quomodo igitur fieri poterit, ut sit actus & perfectio materiæ, cum tale, scilicet, actus materiæ, sit, non, quod est, sed, quo aliquid est, ut patet 7 metaph. Quod si dicitur, hoc esse peculiare animæ intellectivæ, hoc est valde suspectum, & voluntarie dictum, sic etiam Averroisistæ possent dicere, quod anima intellectiva est forma, dans esse, & non tantum operari, cuius oppositum ipse credit, secundum eos, esset quoque difficultas de esse compositi, quod ponitur distinctum ab esse animæ, quodnam est, illud esse, & quodnam corrumpitur, de quo etsi ipsi multa dicant, fateor, me eorum verba tenere, sed non sensum. Quare sapienter mihi visus est Plato dicere, ponens animam immortalem, quod verius homo est anima

animā vtens corpore, quam, compositum ex anima & corpore, & verius eius motor, scilicet corporis, quam eius forma, cum anima sit illud, quod vere est, & vere existit, & potest induere corpus, & eo spoliari. Non video enim, quin & D. Thomas non habeat hoc dicere.

Quantum vero dictum erat de multiplicatione animarum, quod etiam non minus apud me dubium est, cum, 12 metaph. tex. 49, dicit Aristoteles, talem multiplicationem esse per multam materiam. Quod autem dicitur, a quibusdam distingui per habitudines ad diuersas materias, vel, quod loquitur Aristoteles per principia indiuiduantia, quæ materia possunt appellari, mihi & ista videntur intricamenta, & nouæ inuentiones, pro sustentanda positione, & nullo pacto ad mentem Aristotelis. sic enim intelligentias in eadem specie possemus multiplicare, immo, ipsum Deum, quod quantum consonet Peripateticis, aliis relinquo considerandum, &, licet aliqui concedant de intelligentiis, & negent de Deo, adducentes nouas rationes, quod Deus multiplicari non potest, certum est, quod illas rationes non fecit, nec vidit, Aristoteles, & Deus scit, quantum valeant in via Aristotelis, sed tantum superiori rationi simpliciter innititur. Amplius, quia, secundum principia Aristotelis,

dicere, primo quidem. Nam omne incorruptibile est ingenitum, 1 de cœlo, tex. 115, ubi probat eorum conuertibilitatem, sed per concessa, anima intellectiua est incorruptibilis, ergo ingenita, ergo nunquam incepit, quod est oppositum concessi. Sed huic dicitur, negando vltimam consequentiam, ergo nunquam incepit, sed tantum sequitur, ergo nunquam incepit per veram generationem, sed hoc manifeste contradicit textui, sicut etiam notavi, cum exponerem illum locum. Nam Aristoteles dicit, ingenitum voco, quod est, & nunquam fuit verum, dicere, quod fuit. Si igitur anima intellectiua est ingenita, vt ibi loquitur Philosophus, ergo nunquam fuit verum, dicere, quod non fuit. Nam, vt expresse patet, vult illud esse genitum non solum, quod habet veras causas generationis, sed, quodcunque incipit esse, quomodo-cunque incipiat, quod vult conuerti cum corruptibili proportionabiliter sumpto, & sic sumit ingenitum & incorruptibile. Præterea mirabile est, quod tot tantasque rationes adducat Aristoteles, ad probandum conuertibilitatem illorum, & nunquam exceperit animam intellectiuam. Valde enim magnam causam dedisset errandi. Præterea, quod vltius dicit, eas remanere post mortem & nullam Aristoteles faciat mentionem de eis, valde improbabile videtur, cum Aristoteles, tam diligens naturæ perscrutator,

C

cor,

tor, in Poësi, in Rhetoricis, & in multis aliis, fuerit tam diligens, & in re tam excellenti negligens. Amplius, quia, 1 Ethic. videtur ponere nullam felicitatem post mortem, immo, quod magis est, D. Thomas, in 1 lectione 3 Ethic. super illa parte, quod quis magis debet eligere mortem, quam magnum scelus committere, quasi dubius, quomodo Aristoteles hoc ponit, dicit, quod hoc dixit Aristoteles, quia post mortem remanet gloria, vel, quia, persistere in illo actu virtuoso per modicum tempus existimat melius, quam, vivere diu in actu vitioso, modo, si D. Thomas credit, Aristotelem tenere immortalitatem, nulla harum causarum esset conueniens. In promptu enim esset, propter alium statum, unde D. Thomas quasi admittatur, quod, cum Aristoteles ponat, post mortem nihil esse, quomodo vult, quod aliquis malit mori, quam male viuere. Nam & ipse, in expositione Symboli Apostolorum, super carnis resurrectionem, dicit, quod, si non expectarem resurgere, homo magis deberet perpetrare quodcunque scelus, quam mori. Amplius, vt supra dictum est, mirabile esset, quod Aristoteles nullam fecisset mentionem de tali statu post mortem, neque promississet declarare, quod tamen est contra suum morem. Præterea oportet vel ponere resurrectionem, vel fingere fabulas Pythagoreas, vel otiosi tam nobilissima entia, quæ omnia

omnia videntur remotissima a Philosopho. Hæc autem dicta sint, non, ut tanto Philosopho contradicamus (quid enim pulex contra elephantem?) sed studio addiscendi.

In quo ponitur quintus modus, scilicet, quod eadem essentia animæ est mortalis & immortalis, verum simpliciter mortalis, & secundum quid immortalis.

CAPVT IX.

CUM itaque primus modus, ponens, intellectuum realiter distingui a sensitivo in mortalibus, secundum omnes impugnatus sit modo, & secundus, ponens, quod intellectuum & sensitivum sunt idem re, &, tale est simpliciter immortale, & secundum quid mortale, sit valde ambiguus, nec convenire videtur Aristoteli, reliquum est, ut ponamus ultimum modum, qui, ponens sensitivum in homine identificari intellectui, dicit, quod essentialiter & vere hoc est mortale, sed secundum quid immortale, &, ut ordine procedamus, dicemus iuxta illa quinque dicta in superiori capitulo.

Primum quidem nos simpliciter concedimus, scilicet, quod intellectuum & sensitivum in homine identificantur in re.

In secundo nos discordamus, quia dicimus, quod tale vere & simpliciter est mor-

tale secundum quid vero & improprie immortale.

Ad cuius euidentiā sciendum est, & valde memoriæ mandandum in hac materia, quod, cum omnis cognitio quoquo modo abstrahat a materia, materia impedit cognitionem, ut ait Commentator, 3 de anima, comm. 5. Et illud est videre in sensibus, qui non cognoscunt secundum qualitates reales, sed secundum eorum intentiones, quare, 2 de anima, dicitur, quod proprium est unicuique sensui, esse receptivum specierum sine materia. Juxta itaque tres modos separationis a materia tres modi cognitionis in uniuersum reperiuntur. Quædam enim sunt, quæ totaliter sunt separata a materia, & sic hæc in eorum cognitione neque indigent corpore, tanquam subiecto, neque, tanquam obiecto. Eorum enim cognitio non recipitur in corpore, cum ipsa non sint in corpore, neque a corpore mouentur, cum sint mouentia, non mota, & hæc sunt substantiæ separatae, quas intellectus, vel intelligentias, appellamus, in quibus neque discursus, neque compositio, neque aliquis motus reperitur, quædam vero sunt, quæ, si non cognoscant per qualitates sensibiles, verum per earum species, quæ quendam modum immaterialitatis induunt. Etenim & sine materia dicuntur & spirituales sunt, tamen, quia in genere cognoscentium infimæ sunt, & valde mate-

ria.

les sunt, ideo in suis operationibus indigent corpore, & tanquam subiecto, & tanquam obiecto. Etenim tales cognitiones & in organo recipiuntur, quare & solum singulariter representant, & a re corporea mouentur, & hæc sunt omnes vires sensitivæ, licet aliquæ illarum sint magis spirituales, & aliquæ minus, ut ait Commentator, 3 de anima, comm. 6, & in libro suo de sensu & sensato, cum natura autem ordinate procedat, ut dicitur 8 Phys. inter ista duo extrema, scilicet, non indigere corpore, ut subiecto, vel, ut obiecto, &, indigere corpore, ut subiecto & obiecto, est medium, quod neque est totaliter abstractum, neque est totaliter immersum. Quare, cum fieri nequeat, ut aliquid indigeat corpore tanquam subiecto, & non tanquam obiecto, ut manifestum est, relinquitur, ut tale intermedium non indigeat corpore tanquam subiecto, verum tanquam obiecto. hoc autem est intellectus humanus, qui per omnes antiquos & modernos ponitur medius inter abstracta & non abstracta, scilicet inter intelligentias & gradum sensitivum, infra quidem intelligentias, & supra sensitiva. Quare & in Psalmo dicitur, *minuisti paulo eum ab Angelis*, &, paulo post, *constituisti eum super opera manuum tuarum, oves, & boues*, &c. hicque modus cognoscendi est ille, quem dixit Aristoteles, 1 de anima, tex. 12, si, intelligere, aut est phantasia,

tafia, aut non sine phantafia, non contingit hoc esse sine corpore. Et, cum, 3 de anima, declarauit, intelligere, non esse phantafiam, cum non fit organicum, &, quod non potest esse sine phantafia, cum, 19 & 39 eiusdem textu, nequaquam sine phantasmate intelligit anima. Ergo anima humana non indiget organo, vt subiecto, sed, vt obiecto, istis autem omnibus gradibus cognoscitiuis, secundum Aristotelem & Platonem, competit, esse animas. quare, saltem secundum Aristotelem, quodlibet cognoscens est actus corporis physici organici, verum aliter & aliter nam intelligenti non sunt actus corporis, qua intelligentiæ sunt, quoniam, in suo intelligere & desiderare, nullo pacto indigent corpore, sed, qua actuant & mouent corpora coelestia, sic animæ sunt, & sunt actus corporis physici organici. Stella namque est organum cœli, 2 de cœlo, &, 12 Metaph. tex. 48 omnis orbis est propter stellam. quare actuant corpus physicum organicum, &, vt sic, indigent corpore, vt obiecto, verum, sic actuando & mouendo, nihil recipiunt a corpore, sed tantum dant ei. Anima autem sensitiua simpliciter est actus corporis physici organici, quia & indiget corpore, tanquam subiecto, cum non fungatur suo officio, nisi in organo, & indiget corpore, tanquam obiecto, media vero, quæ est intellectus humanus, in nullo suo opere totaliter absoluitur a corpore, neque totaliter

liter immergitur, quare non indigebit corpore tanquam subiecto, sed tanquam obiecto, & sic medio modo inter abstracta & non abstracta erit actus corporis organici. Nam intelligentiæ, qua intelligentiæ, non sunt animæ, quia nullo modo, vt sic, dependent a corpore, sed, qua mouent corpora cœlestia. At intellectus humanus in omni suo opere est actus corporis organici, cum semper dependeat a corpore, tanquam obiecto est & differentia inter intelligentiam & intellectum humanum, in dependendo ab organo, quoniam humanus recipit & perficitur per obiectum corporale, cum ab eo moueatur. At intelligentia nihil recipit a corpore cœlesti, sed tantum tribuit, a sensitua autem virtute differt intellectus humanus in dependendo a corpore, quia sensitua subiectiue & obiectiue dependet, humanus autem intellectus obiectiue tantum, & sic, medio modo, humanus intellectus inter materialia & immaterialia est actus corporis organici. Quapropter non vno modo corpora cœlestia, homines, & bestię, animalia sunt, cum non vno modo eorum animæ sint actus corporis physici organici, vt visum est. Ideo Alexander, in paraphrasi de anima, dixit, intelligentiam satis æquiuoce dici animam cœli, & cœlum animal, cui & consentire videtur Auersoes, libro de substantia orbis, proprie vero bestiæ animalia dicuntur, sicut est communis vsus loquendi,

di, medio autem modo homines animalia nuncupata sunt. Neque apud Aristotelem fingendum est, quod iste modus intelligendi intellectus humani sit ei accidentalis, scilicet, moueri ab obiecto, & non indigere subiecto, tum, quia vnus rei operandi essentialis, tum, quia, sicut modus est tantum vnus, modus sensitiui nunquam transmutatur in modum intelligentiæ, vel intellectus humani, neque modus intelligentiæ in modum humani, vel sensitiui, ita pariter modus humanus intelligendi non videtur posse transmutari in modum intelligentiæ, quod esset, si intelligeret absque indigentia corporis, vt subiecti & obiecti. Hoc etiam firmatur, quia sic natura transmutaretur in alteram naturam, cum operationes essentialis transmutarentur. Amplius per nullum naturale signum cognosci potest, intellectum humanum habere alium modum intelligendi, vt experimento comprehendimus, quoniam semper indigemus phantasmate. Quare concluditur, quod hic modus intelligendi per phantasma est essentialis homini. Ex quibus modo est syllogisanda conclusio principalis intenta, scilicet, quod anima humana simpliciter materialis est, & secundum quid immaterialis.

Primo per syllogismum diuisiuium sic, humanus intellectus est immaterialis & materialis, vt patet per habita, sed non æqualiter de his participat, neque est plus
imma.

immaterialis, quam materialis, ut probatum est capite præcedenti, ergo est magis materialis quam immaterialis, & sic simpliciter erit materialis, & secundum quid immaterialis.

Secundo, essentialē est intellectui, intelligere per phantasmata, ut monstratum est, & patet per definitionem animæ, cum sit actus corporis physici organici, quare in omni opere indiget organo, sed, quod sic intelligit, de necessitate inseparabile est, ergo humanus intellectus mortalis est. Minor autem patet, tum ex Aristotele, dicente, si, intelligere, est phantasia, aut non sine phantasia, non contingit, ipsam separari, tum, quia, si inseparabilis esset, vel non haberet operationem, & sic otiaretur, vel haberet, & sic phantasmate operaretur, quod est contra maiorem demonstratam. Et iterum hoc sic firmatur, quoniam Aristoteles non posuit aliquam intelligentiam sine corpore, cum, 12 metaph. secundum numerum orbium ponit numerum intelligentiarum, multo ergo minus potest ponere intellectum humanum sine corpore, cum sit longe minus abstractus, quam intelligentia, immo, si mundus est æternus, ut opinatus est Aristoteles, infinites infinitæ formæ sunt actualiter sine corpore, quod apud Aristotelem ridiculum videtur. quare anima humana, apud Aristotelem, absolute pronuntianda est mortalis, verum, cum sit

media inter abstracta simpliciter, & immersa materię quoquo modo, de immortalitate participat, quod & sua essentialis operatio ostendit. Nam non dependet a corpore, tanquam subiecto, in quo conuenit cum intelligentiis, differt a bestiis, indiget corpore, vt subiecto, in quo conuenit cum bestiis, quare & mortalis est, & ad completam intelligentiam eorum, quę dicta sunt, scire, oportet, quid sit, indigere organo, vt subiecto, & vt obiecto, & eis non indigere.

Indigere itaque organo, vt subiecto, est, in corpore recipi, & modo quantitatio, & corporali, sic, quod cum extensione recipiatur, quomodo dicimus omnes virtutes organicas recipere, & suis officiis fungi, sicut oculus videndo, & auris audiendo. Visio namque est in oculo & modo extensio. quare non esse in organo, siue subiectiue eo non indigere, est, vel non esse in corpore, vel in eo non esse modo quantitatio. Vnde dicimus, intellectum non indigere corpore, vt subiecto in sui intellectiōe, non, quia intellectio nullo modo fit in corpore, cum fieri nequit, si intellectus est in corpore, vt sua immanens operatio quoquo modo non fit in eo. Vbi enim subiectum est, & accidens subiecti, necesse est, esse, sed, pro tanto, intellectio dicitur non esse in organo, & in corpore, quoniam, modo quantitatio & corporali, non est in eo.

qua-

quapropter potest intellectus reflectere supra seipsum, discurrere, & vniuersaliter comprehendere, quod virtutes organicæ & extensæ minime facere queunt, hoc autem totum prouenit ex essentia intellectus, quoniam, qua intellectus est, non dependet a materia, neque a quantitate. quod si humanus intellectus ab ea dependet, hoc est, ut sensui, coniunctus est, quare accidit sibi, qua intellectus est, a materia & quantitate dependere, unde & eius operatio non est magis abstracta, quam essentia. Nisi enim intellectus haberet, quod ex se posset esse, sine materia, intellectio ipsa non posset exerceri, nisi modo quantitativo & corporali. At quamuis intellectus humanus, ut habitum est, intelligendo non fungatur quantitate, attamen, quoniam sensui coniunctus est, ex toto a materia & quantitate absolui non potest, cum nunquam cognoscat sine phantasmate, dicente Aristotele, 3 de anima, nequaquam sine phantasmate intelligit anima, unde, sic indigens corpore, ut obiecto, neque simpliciter vniuersale cognoscere potest, sed semper vniuersale in singulari speculatur, ut unusquisque in se ipso experiri potest. In omni namque, quantumcunque abstracta, cognitione idolum aliquod corporale sibi format, propter quod humanus intellectus primo & directe non intelligit se, componitque, & discurret, quare suum intelligere est cum

COR.

continuo & tempore, cuius totum oppositum contingit in intelligentiis, quæ sunt penitus liberatæ a materia. ipse igitur intellectus, sic medius existens inter immaterialia & materialia, neque ex toto est hic & nunc, neque ex toto ab hic et nunc absoluitur, quapropter neque sua operatio ex toto est vniuersalis, neque ex toto est particularis, neque ex toto subiicitur tempori, neque ex toto a tempore remouetur. Recte autem & ordinate sic processit natura, vt a primis ad extrema per media deueniat. Intelligentiæ enim, cum simpliciter abstractæ sint, nullo modo, intelligendo, indigent corpore, vt subiecto, vel, vt obiecto, quare simpliciter naturam cognoscunt, primo se intelligentes, & simplici intuitu, quapropter & a tempore, & a continuo, absolutæ sunt. virtutes autem sensitivæ, cum immerse sint materiæ, tantum singulariter cognoscunt, non reflectentes supra seipsas, neque discurrentes. At humanus intellectus, sicut medius existit in esse, sic & in operari, veluti retro dictum est, vnde recepta in eo, neque penitus sunt potentia intellecta, nec actu intellecta. Patet igitur, quid sit, indigere corpore, vt subiecto, &, vt obiecto, &, eis non indigere, quæque indigent, quæque non indigent, & quomodo. Vltcriusque sciendum est, quod, quicumque ponunt, animam esse immortalem, & multiplicatam dicunt, quod ex eo, quod est naturæ
 imma-

immaterialis, ipsa est hoc aliquid per se
 subsistens, quare & sine corpore potest esse
 & operari ipsaque, sic separata existens, non
 habet de virtutibus animæ nisi intellectum
 & voluntatem, sicut & intelligentiæ, unde
 nullam virium sensitiuarum, vel vegetati-
 varum, habet, nisi, velut in principio valde
 remoto. At quoniam ipsa inter substantias
 abstractas infima est, ultra illum modum
 essendi habet & alium. Nam & potest esse,
 quo aliquid sit, quare veraciter potest cor-
 pus ipsum informare, & ex sui imperfectio-
 ne numerari ad numerationem corporum,
 induitque omnes vires sensitiuæ, & vege-
 tatiuæ. quare cum organo illas exercet, &
 ut sic, morticina sit, intellectum autem &
 voluntatem, sic coniuncta corpori, quam-
 vis habeat, libere tamen eas exercere non
 valet, quandoquidem sine corporali instru-
 mento, saltem ut obiecto earum, officio
 fungi non potest, cuius oppositum contin-
 git in separatione, quoniam totaliter abs-
 que organo corporali exire potest in actum.
 At altera opinio, existimans, hæc esse deli-
 ramenta, & principiis Philosophiæ repu-
 gnantia, utpote, quod idem sit hoc aliquid
 per se subsistens & etiam, quo hoc aliquid
 aliud sit, tanquam disparatos modos ope-
 randi habens, modusque ille essendi separa-
 tus nulla ratione, vel experimento, proba-
 tus, sed sola voluntate positus, modoque
 habens potentias sensitiuæ & vegetatiuæ,
 modo

modo eas deferens, secundum vnum modum intelligens coniuncta, secundum alium separata, paucissimoque tempore coniuncta, infinito separata, nisi fingamus transmigrationem animarum in corpore, ipsamque incepisse, & nunquam defecturam, modo induens corpus, modo spolians, ut vulgus fert de lamiis, cumque a corpore separatur, definit actualiter esse actus corporis, quare vel nullibi est, vel, si alicubi, quomodo igitur illuc peruenit. Aut enim alteratione, aut motu locali, non alteratione, ut manifestum est, neque motu locali, cum, sexto physic. indiuisibile localiter moueri non potest. quod si nullibi ponitur, quid igitur prohibet, secundum Aristotelem, ponere & aliquas intelligentias non mouentes orbes, infinitesque infinita otietur illa multitudo, neque sciri potest, an otietur, vel operetur, nisi confictum aliquid, vel voluntarium, ponatur, cumque materialia actu infinita esse non possunt, in quibus manifesta est multiplicatio, & etiam necessaria est in immaterialibus, in quibus non est necessaria multiplicatio, neque possibilis est distinctio in eadem specie, ponitur infinita multitudo actu. Quapropter, cum hæc omnia irrationabilia & ab Aristotele aliena esse videantur, ideo rationabilius videtur, quod anima humana, cum sit suprema & perfectissima materialium formarum, vere est, quo aliquid

quid est hoc aliquid, & nullo modo ipsa vere est hoc aliquid, quare vere est forma simul incipiens & desinens esse cum corpore, neque aliquo pacto potest operari, vel esse sine eo, vnumque tantum modum essendi, vel operandi, habet, quare & multiplicari potest, cum istud vere sit principium multiplicandi in eadem specie, neque sunt actu infinitæ, sed tantum potentia, sicut & cetera materialia, virtutesque habet organicas & simpliciter materiales, scilicet sensitivæ & vegetativæ, verum, cum ipsa sit materialium nobilissima, in confinioque immaterialium aliquid immaterialitatis odorat, sed non simpliciter, unde habet intellectum & voluntatem, in quibus cum Diis convenit, verum satis imperfecte & æquivoce, quando quidem Dii ipsi totaliter abstrahunt a materia, ipsa vero semper cum materia, quoniam cum phantasmate, cum continuo, cum tempore, cum discursu, cum obscuritate, cognoscit, quare in nobis intellectus & voluntas non sunt sincere immaterialia, sed secundum quid & diminute, unde verius & ratio, quam intellectus appellari dicitur. Non enim, ut ita diximus, intellectus est, sed vestigium & umbra intellectus, cui testatur quod dicitur 2 Metaph. sicut se habet oculus nyctikoracis ad lumen solis, sicut intellectus noster ad manifestissima in natura, quanquam per-

verse

verse illud exposuerit Auerroes, &, quem-
admodum luna est de natura terræ, vt dicit
Aristoteles, lib. de anima, sic anima humana
est de natura intelligentiæ, in Luna autem
est terra solum secundum proprietatem,
non autem secundum essentiam, quare &
intelligere, est in anima humana secundum
participationem proprietatis, & non essen-
tiæ, hoc autem totum consonat naturæ,
quæ gradatim procedit. Vegetabilia enim
aliquid animæ habent, cum in seipsis ope-
rentur. At multum materialiter, cum suis
non fungatur officiis, nisi per qualitates
primas, & ad esse reale earum operationes
terminantur. Deinde succedunt animalia,
solum tactum & gustum habentia, & inde-
terminatam imaginationem, post quæ sunt
animalia, quæ ad tantam perfectionem per-
ueniunt, vt, intellectum habere, existime-
mus. Nam multa mechanice operantur, vt
construendo casas, multa civiliter, vt
apes, multa omnes fere virtutes morales,
vt patet inspicienti libros de hist. anim. in
quibus miranda ponuntur, quæ referre ni-
mis esset prolixum. immo, infiniti fere ho-
mines minus videntur habere de intellectu,
quam multæ bestię. Ponitur & cogitativa
inter vires sensitivas, de cuius excellentia
quid dicere oportet, quando, teste Com-
mentatore, 2 de anima, comm. 60, cogno-
scat indiuidua decem prædicamentorum,
ratioque particularis ab omnibus posita sit,
immo,

immo, Galenus, Homerus, & multi excellentes viri, ipsam esse intellectum, existimauerunt. quod si parum ascendamus, humanum intellectum ponemus immediate supra cogitativam, & infra immaterialia, de utroque participantem, ut scilicet non indigeat corpore, ut subiecto, ad modum prius expositum, & indigeat, ut obiecto, qui modus est sibi essentialis & inseparabilis, quare inter materiales formas absolute reponendus est, cui attestatur, quod tantum cum mortalibus conuersatur, nisi fingamus, ut Antiqui, homines Deos fieri, & in coelum rapi, quod totum fabulosum, 3 & 12 Metaph. esse, existimavit Aristoteles, illudque a legibus esse confictum, propter hominum utilitatem. Ad hanc itaque positionem nullum sequi videtur inconueniens, omnia rationi & experimentis consonare, nihil fabulosum, nihil creditum poni. Quod si quæ videntur contra hunc modum esse, utpote, cum sit in materia calida & frigida, quomodo fieri potest, ut non qualis fiat, & in sui opere organo non fungatur, & vniuersaliter non recipiat, hæc certe & huiusmodi, satis debilia non minus difficultatem faciunt contra priorem positionem, cum & ipsa fateatur, esse formam in materia. Quod si quis dicat, neutram opinionem esse veram, sed illam Auerrois, profecto apud me, quicumque eam opinionem imaginatur, ipse est fortissimæ imaginationis,

nationis, credoque, pictores nunquam pulchrius monstrum hoc monstro finxisse, cum hoc quoque sit contra Aristotelem, ut supra monstratum est. Quare hæc recitata mihi inter omnes probabilior videtur, magisque ad mentem Aristotelis. Ex quibus omnibus patere potest, quod multa, quæ dicuntur ab Aristotele de intellectu, videntur se inuicem oppugnare, cum minime oppugnent. Dicit enim quandoque, quod est materialis & mixtus, seu, non separabilis, quandoque vero, quod est immaterialis & separabilis. In definitione namque dicitur, quod est actus corporis organici, quandoque vero dicitur, quod nullius corporis est actus, hæc vero pugnantia videntur. quare in diuersos tramites, diuersi declinauerunt, & aliqui existimant, Aristotelem se ipsum non intellexisse, verum omnia iam aperta sunt ex prædictis, neque vlla est contrarietas. Intellectus enim absolute & qua intellectus est, omnino immixtus & separatus est, at humanus utrumque retinet. Nam separatur a corpore ut subiecto, non separatur vero ab obiecto, intellectus etiam, qua intellectus, nullo modo est actus corporis organici, quoniam intelligentiæ non indigent organo ad intelligendum, sed tantum ad mouendum. At intellectus humanus, qua humanus, est actus corporis organici, ut obiecti, & sic non separatur, non autem, ut subiecti, & sic separatur, quare nul-

nullum repugnans.

In tertio autem dicto, videlicet, quod anima est fere forma hominis, apparet, quod longe melius secundum istum modum saluatur, quam secundum priorem. Est enim, ut dicebatur, valde difficile, imaginari quod vnum, per se existens, sit fere forma. quare D. Gregorius Nyssenus, ut refert D. Thomas de eo, cum vidit, Aristotelem dicere, animam esse actum corporis, dixit, Aristotelem credere, animam humanam esse corruptibilem, quia forma per se existens vere non potest esse actus corporis organici, immo, & aliqui dicunt, hoc etiam sensisse Gregorium Nazianzenum de Aristotele.

Quartum autem, scilicet, quod animæ humanæ sint numeratæ, affirmamus, verum illa, quæ superiorem modum torquebant, nos non torquent. Etenim, cum materiales sint, distinguuntur per materiam, neque infinitas animarum nos conturbat.

De quinto etiam dicimus, quod anima humana est facta, sed non per creationem, verum per generationem, cum sol & homo generent hominem, 2. Phys., & ipsa est ultima in consideratione naturali, & quod dicitur, 1. de part. cap. 1, de intellectu, non spectare ad naturalem, verum est de vero intellectu. Ipse enim est mouens, non motus, at humanus est mouens motus, quare hic est de consideratione, ille vero minime. cum, 2. Phys., quæ non mota movent, non sunt

sunt physicæ considerationis, & hanc rationem tangit Philosophus ibi, 1 de part. Cumque ulterius dicebatur, ipsam venire de foris, intelligendum est, ut mens simpliciter, non humana, vel, si ut humana, intelligendum est non absolute, sed, quod in ordine sensitivam & vegetativam magis participat de Diuinitate. Nam, 4 de part. cap. 9, solus homo est erectæ naturæ, quia solus homo multæ Diuinitatis est particeps. Non tamen ponimus, quod homo remaneat post mortem, quantum ad eius animam, cum incipiat esse, & 1 de cœlo, quicquid incipit, definit, & Plato, 8 de legibus, dicit, quicquid quomodocunque incipit esse, & definit esse, & quod dicitur de textu 17 duodecimi Metaph. non approbo Alexandri responsionem, quam ibi refert Commentator ex relatione Themistii, illud scilicet intelligi de intellectu agente (nam intellectus agens non est forma hominis) sed intelligitur de intellectu possibili, qui quandoque intelligit, & quandoque non corrumpitur enim quodam interius corrupto, id est, sensitivo, cui identificatur, verum Aristoteles illud intelligit de per se, & non per accidens, quasi dicat, nihil prohibere, cum remanere, quia intellectus est, non, quia humanus, cum iam, 1 de cœlo, monstratum est, quod omne genitum corrumpitur, sed, quod hæc mens fuerit Aristotelis de anima humana, potest manifestari ex 11 Metaph.

tex.

tex. 39 ubi scribit hzc. *Delectatio autem, qualis optima, parvo tempore nobis. Sic enim semper illis est, nobis quidem impossibile.* Ex quibus verbis primo apparet, quod Dii simpliciter immortales sunt. Nam, si semper delectantur, quoniam semper intelligunt (in eodem enim textu sequitur, *vigilatio, sensus & intelligentia, delectabilissimum*) si ergo semper delectantur, semper sunt. Ergo immortales sunt. At homines mortales sunt, quoniam paucissimo tempore delectantur. operari enim sequitur esse. Quod si homo quandoque immortalis nuncupatur, id intelligitur secundum quid, quoniam & 2 de part. cap. 10, dicitur, solus homo inter mortalia maximæ Diuinitatis est particeps, comparatusque ceteris mortalibus, immortalis dici potest. Sicut enim dictum est, homo est medius inter Deos & bestias, quare sicut pallidum, comparatum nigro, dicitur album, sic homo, comparatus bestiis, dici potest Deus & immortalis, sed non vere & simpliciter. Quod si maiores nostri, homines, in Deos versos, aliquando posuerunt, inquit Aristot. 12 Metaph. tex. 50, hoc fabulose posuerunt, ad persuasionem multorum, & ad opportunitatem multorum, & ad leges conferens, sed solus Deus ipse proprie immortalis dicitur, in fine 11 illius 39 textus dicit, dicimus autem Deum animal esse sempiternum optimum, quare vita & duratio continua & æterna existit Deo. hoc enim

enim Deus. Alterum etiam ex istis verbis apparet, scilicet humanum intellectum, sine phantasmate, non intelligere. Namque æterna semper delectantur, quia semper intelligunt, ipsa in sua intellectione non indigent phantasmate. Si enim indigerent, æterna non essent, cum, 2 de anima, phantasia sit motus factus a sensu secundum actum, immo, nec sunt mota ab aliquo, dum intelligunt, dicente Philosopho, eodem tex. 50, diuinissimum & honorabilissimum non transmutatur. Indignius enim transmutatio & motus quidem iam tale, immo, in eis, quod intelligit, quod intelligitur, & intellectio, idem sunt, vt, eisdem citatis textibus, dicitur. At humanus intellectus, cum paucissimo tempore intelligit, non potest absolui a phantasmate, cum non intelligat, nisi motus. Nam, intelligere, in quodam pati consistit, mouens autem intellectum est phantasma, vt patet 3 de anima, quare non intelligit, sine phantasmate, quanquam non, sicut phantasia, cognoscit, quoniam, medius existens inter æterna & bestias, vniuersale cognoscit, secundum quod cum æternis conuenit, & differt a bestiis, tamen vniuersale in singulari speculatur, quod differt ab æternis, & conuenit quoquo modo cum bestiis. Bestiæ autem ipsæ, in fine cognoscentium constitutæ neque simpliciter vniuersale, neque vniuersale, in singulari,

ri, sed tantum singulare singulariter, comprehendunt. Sunt itaque in vniuersum tres modi animalium, cumque omne animal cognoscit, sunt & tres modi cognoscendi. sunt enim animalia omnino æterna, sunt & omnino mortalia, sunt & media inter hæc. prima sunt corpora cœlestia, & hæc nullo modo in cognoscendo dependent a corpore. alia vero sunt bestię, quę a corpore dependent, vt subiecto & obiecto, quare tantum singulare cognoscunt. intermedia vero sunt homines, non dependentes a corpore, vt subiecto, sed tantum, vt obiecto, quare neque vniuersale, simpliciter, vt æterna, neque singulariter tantum vt bestię, sed vniuersale in singulari, contemplantur. Hos autem tres modos cognoscendi insinuauit Aristoteles, i de anima, cum dixit, si, intelligere, est phantasia, aut non est sine phantasia. Nam per phantasiam intelligit sensum, qui vtroque modo indiget corpore, scilicet, vt subiecto, &, vt obiecto, per non esse vero phantasiam, & non esse sine phantasia, intelligit intellectum humanum, quare indiget corpore vt obiecto, & non, vt subiecto, illud autem, quod neque est phantasia & omnino est sine phantasia, vere intellectus est, & est diuinorum, neque plures modi cognoscendi ab Aristotele in aliquo loco sunt reperti, neque consonat rationi. Dicere enim, vt volunt affirmantes, intellectum humanum esse

esse absolute immortalem, ipsum intellectum duos habere modos cognoscendi, scilicet, sine phantasmate omnino, & aliū, cum phantasmate, est. transmutate naturam humanam in diuinam, & parum hoc distat a fabulis Ouidii, in libro metamorphoseos. Concedit enim, philosophos antiquos hoc fabulose posuisse ad vtilitatem legum, sicut dictum est. Quod si quis calumniabitur, quoniam dictum illud, scilicet, nos paucissimo tempore delectati, intelligendum est de homine, & non de eius anima, quare homo non intelligit sine phantasmate. Homo enim mortalis est, at anima eius immortalis est, quare, vt, in separatione sine phantasmate intelligit, sed obsecro sic calumniantem, immo, cauillantem, videre, ne, dum Aristotelem interpretari studeat, Aristotelem corrumpat, in primis quidem, quoniam Aristoteles hic non facit differentiam inter hominem & animam, cum neque inter Deum & corpus cœleste. Dicit enim, Deum esse animal æternum. secundo, quia, si tantum de homine & non de anima eius, intelligit, vbi igitur de cognitione animæ separatæ loquitur? Nam ibi erat locus, cum in metaphysica sit, quæ est de separatis. Tertio, quia sic anima humana simpliciter efficeretur diuina, cum modum operandi Diuinorum sumeret, & sic poneremus fabulas Ouidii, scilicet, naturam in alteram naturam

ram

ram transmutari. Quarto, quoniam in tanta re Aristoteles nunquam verbum faciens maxime esset accusandus. quare sic excusantes Aristotelem, maxime Aristotelem inculant. Quod si quis dicat, quod de esse animæ separatæ Aristoteles, 3 de anima textu, comm. 36, promittit tractare, cum dixit, se posterius pertractaturum, an humanus intellectus possit separate intelligere, quare vel liber metaphysicæ ab Aristotele non fuit perfectus, fortassis morte præuenio, vel, quoniam nondum complementum peruenit ad nos, vnde non mirum sit, si de eius esse separato nihil ab Aristotele habemus, quod per Commentatorem, 3 de anima, comm. 36, confirmatur, cum ipse dicat, istam quæstionem non fuisse terminatam ab Aristotele, quantum adhuc habemus per eius libros, quare est tam difficilis. Ad hoc autem dicitur, quod illa verba magis arguunt oppositum, quam propositum. Dicis enim sic, vt cum autem contingat, aliquem separatorum intelligere ipsum existentem non separatum a magnitudine, aut non, considerandum posterius. ex quibus apparet primo, quod intellectus humanus a magnitudine non est separabilis, quare sine phantasia non cognoscit, & si sic, inseparabilis est, quoniam, si est phantasia, aut non sine phantasia, inseparabilis est, verum ad quod dicitur (posterius perscrutandum)

D

dum)

dum) D. Thomas, in expositione ultimi textus 9 metaph. dicit, illo textu Aristotelem illam questionem determinare, quam insolutam 3 de anima reliquit, quanquam ipse D. Thomas, 3 de anima, aliter dixerit, scilicet in Metaphysica in melius mutauit sententiam, verum talis cognitio, quæ, 9 metaph., ponitur de intelligentiis, non est sine phantasmate, cum & in principio 2 metaph. dicat Aristoteles; intellectum nostrum ad separata se habere, sicut Nyctikorax ad lumen solis, vnde & D. Thomas, lib. 3 contra gentiles, cap. 48, dicit, sententiam Aristotelis de intellectu separatorum esse, quod tantum ea intelligimus secundum cursum scientiæ speculatiuæ, quare non sine phantasmate, vt notum est, & diligenter aduerte, quod ibi videtur innuere hanc nostram opinionem, scilicet, quod Aristoteles senserit, animam humanam non vere esse intelligentiam, sed solum habere quandam participationem intellectus, quare & improprie immortalis, puto tamen, quod & illud verbum (posteriorius perscrutandum) potest intelligi de libris Ethicorum. ibi enim declarat, quod vltima felicitas animi est in contemplatione abstractorum per Metaphysicam, quare idem, quod prius.

*In quo respondetur ad obiecta aliarum
opinionum.*

CAPVT X.

VT validior sit nostra positio, operæ pretium est, ad ea, quæ in oppositum per alias opiniones adducta sunt, respondere, & quoniam tenemus, in homine idem secundum rem esse vegetatiuum, sensitiuum & intellectiuium, ideo respondetur, quod contradictoria de eodem absolute dici non possunt, tamen, quod vnum absolute, & alterum secundum quid, vel ambo secundum quid, non inconuenire, sicut dicitur in Elenchis, & sic est in proposito. nam intellectus humanus absolute est mortalis & secundum quid immortalis.

Ad primum, contra secundum dictum, dicitur, quod anima humana, sic potens recipere omnes species formarum materialium, duas habet conditiones, vnâ scilicet, quod secundum se est immaterialis & non indigens organo, tanquam subiecto, pro quanto recipit & intelligit illa, quod nos concedimus, verum alteram habet, quoniam formas illas non recipit, nisi mota a phantasmatibus, sicut plane ibi docet Aristoteles, quare indiget organo, tanquam obiecto, sed per demonstrata, quod

D 2

fic

sic se habet, est simpliciter materiale, & secundum quid immateriale, & hæc est nostra conclusio intenta. Quod si dicitur, nunquid ipsa est forma materialis? dicimus, quod in parte sit, & in parte non, & quantum ad id, quod de immaterialitate participat, licet non cognoscat se per speciem propriam, sed aliorum, ut dicitur 3 de anima, secundum tamen illud esse, potest quoquo modo supra seipsum reflectere & cognoscere actus suos, licet non primo & ita perfecte, sicut intelligentiæ. nec mirandum est, quoniam anima intelligendo non utitur organo corporali, neque appenditiis materiæ, & si ulterius instetur, ipsa anima non habet esse, nisi in materia, & per qualitates primas una cum qualitate, sed cum operari sequitur esse, ergo sine illis operari non potest, ergo non potest operari sine appenditiis materiæ, cuius oppositum dicis. Præterea, secundum philosophum 2 & 3 de anima, ad hoc, ut pupilla recipiat omnes colores, non solum sua essentia non debet esse color, verum nec coniuncta colori. ergo, si anima intellectiva debet recipere omnes formas materiales, nedum debet esse immaterialis, verum nec alicui formæ materiali coniuncta, & per consequens neque cum calido, vel frigido, quod tamen falsum est. verum sic opponens non videt, quod & hæc omnia sunt contra alias opiniones, nam & secundum eas anima non est in.

in materia, nisi per quale & quantum, quare & sine illis operari non poterit. quod si qua est responsio pro eis, & pro hac erit. veruntamen ad primum dicitur, quod reuera intellectus humanus non potest intelligere, nisi in materia sint quale & quantum sensibile, cum non possit operari, nisi ipse sit, ipseque esse non potest, nisi cum dispositione conuenienti, non tamen sequitur, quod per tales dispositiones intelligat, immo, vt satis liquet, non sequitur in sensu. nam virtus visiuā non videt, nisi oculus sit calidus, non tamen per caliditatem, vel aliquam aliam qualitatem realem, videt, sed per speciem visibilem.

Ad secundum dicitur, quod materiale vniuersaliter non impeditur per coexistentiam alterius materialis a cognitione, (sic enim visus non cognosceret colores, cum visui sint coniunctæ primæ qualitates) sed bene per coexistentiam alicuius illorum, quorum ipse est perceptiuus, impeditur. per rubedinem eum impeditur a cognitione aliorum colorum, quorum & rubedinis est perceptiuus. quapropter, si intellectus esset pura forma materialis, cum omnium formarum materialium est perceptiuus, impediretur ab earum cognitione. At, ipsum esse immaterialem, probatum est, licet non simpliciter immaterialis sit, quapropter per coexistentiam formarum materialium non im-

peditur. alterius enim rationis sunt materiale & immateriale. intellectus enim agens non impedit possibilem a receptione specierum, quantumcunque perficiat possibilem, sicut dicit Commentator, comm. 4 & 5 tertii de anima.

Ad secundum vero, in oppositum adductum, dicitur, quod ea, quæ sunt in intelligentiis, sunt simpliciter actu intellecta, & penitus a materia denudata, quæ autem sunt in sensu, sunt mere intellecta in potentia, quæ vero sunt in intellectu humano, medio modo se habent, quoniam species primo vniuersaliter repræsentat, secundo vero, vt in supposito, quandoquidem ex toto absolui non potest a materia, cum intellectus, pro quacunque sui cognitione, moueatur ab objecto, & in singulari speculetur vniuersale, sicut dictum est, sed per monstrata hic arguit virtutem secundum quid, non autem simpliciter immaterialem. Quod si dicitur, cum ipse intellectus sit in hac quantitate, quomodo igitur species, in eo recepta, poterit vniuersaliter repræsentare? Cui dicitur, hoc nihil prohibere, primo, quia accidit sibi, quia intellectus est, vt sit in quantitate. secundo, quoniam, etsi est in quantitate, tamen quantitas non est principium illius operationis, neque in eo opere ea per se vtitur. Tertio, quoniam ex dictis patet,

patet, non ex toto absoluitur a quantitate & eius conditione, cum semper speculetur vniuersale in particulari. intellectus enim humanus habet, & quod sit intellectus, & humanus. qua enim intellectus est, vniuersale cognoscit, sed, qua humanus, vniuersale, nisi in singulari, perspicere nequit. Ad illud vero de organo dicitur, iuxta prædicta, ipsum indigere eo, vt obiecto, non subiecto, quid autem vtrumque horum sit, superiori capite dictum est, & si instetur, nonne coniungitur materiæ per qualitates primas, qualis igitur vti que fiet? quare aut calor, aut frigus. non igitur omnia cognoscet. Ad quod dicitur, intellectum non coniungi materiæ, qua intellectus est, sed, qua coniungitur sensui, quare, etsi in opere sentiendi qualis fiat, non tamen in opere intelligendi, propter quod, vt intellectus est, non est qualis, neque organicus. Quod si vltius queratur, quod, intelligere, humanum sit accidens, quod sine subiecto esse non potest, in quo igitur ponetur ipsum intelligere? Ad quod dicitur, vere, secundum essentiam, ipsum intelligere esse in ipso intellectu, iuxta illud, 3 de anima, anima est locus specierum non tota, sed intellectus, verum, quoniam intellectus humanus est in materia, quasi per quandam concomitantiam, & ipsum intelligere,

re quodam modo est in materia, sed satis accidentaliter, quoniam intellectus, quia intellectus est, accidit, esse in materia, non tamen in aliqua parte corporis ponitur ipsum intelligere, sed in toto, categorematice sumpto. non enim in aliqua parte, quoniam sic esset organicus intellectus, & vel non omnia cognosceret, vel, si omnia cognosceret, ut cogitativa, tantum singulariter, & non vniuersaliter cognosceret, quare, sicut intellectus est in toto, ita & intelligere, non inconuenienter igitur Alexander posuit, totum corpus esse instrumentum intellectus, quoniam intellectus omnes vires comprehendit, & non aliquam partem determinatam, quoniam sic non omnia cognosceret, sicut neque aliqua virtutum sensitivarum. quanquam autem sic totum corpus ponatur instrumentum intellectus quasi, ut subiectum, non tamen vere est ut subiectum, quoniam, intelligere, non recipitur in eo modo corporali, ut prius dictum est. Et, si amplius queratur, an humanus intellectus indiuisibiliter recipiat, dicitur, quod, quia intelligit, indiuisibiliter recipit, quia vero sentit, vel vegetat, diuisibiliter, neque inconuenit, tam multiplicem natura, natura tot diuersos modos recipiendi & operandi habere. Ad illud vero, de experimento, in primis mirere, quomodo Diuus Thomas illud adduxerit, cum Aristoteles, 3 Et hic dicat,

dicat, voluntatem esse impossibilem, veluti in appetendo immortalitatem, inde, si voluntas nostra non est, nisi in anima intellectiva, si, appetendo immortalitatem, per Arist. appetit impossibile, non ergo anima humana potest esse immortalis. Quare dicitur ad argumentum, non esse evidens signum illud, quoniam, ut ibi dicit Philosophus, voluntas naturaliter est impossibile, cum in impossibili possit saluari ratio boni, & quod ulterius dicebatur, appetitum naturalem non frustrari, verum est, sumendo naturale, ut distinguitur ab intellectu. nam illud est opus intelligentiæ non errantis, unde, in quod fertur voluntas sine cognitione, frustrari non potest, at, si per cognitionem, frustrari potest, nisi sit recta ratio. presentato enim summo bono, etiam Diis competente, voluntas fertur in illud esse impossibile. quare, ne frustretur, oportet, voluntatem esse regulatam per rationem rectam, licet etiam dicere possemus, quod, sicut mulus medius inter asinum & equum de utrisque participat, non tamen vere habet proprietates equi, vel asini, sic & anima humana media inter materialia & immaterialia affectat æternitatem, licet eam assequi perfecte non possit. nam & mulus, habens omnia instrumenta ad generationem, perfecte eam consequi non potest, quanquam eam maxime desideret, immo.

D ;

non

non inconuenit, aliquod naturaliter a tota specie frustrari, dummodo secundum genus non frustretur, sicut dictum est de muris, in quibus frustrantur membra generationis, sed saluantur in suo genere, & talpa, oculos habens, non videt, sed, in animali non frustrantur, vt habetur lib. de hist. anim. Quare & humanus animus desiderat immortalitatem, quam consequi non potest absolute, sed sufficit, quod separata simpliciter consequatur. quare, Aristoteles, 2 metaphys., comparauit humanum intellectum noctuæ, & non talpæ. noctua enim aliquammodo videt, talpa autem nihil, vnde & 9 metaph. tex. ult., dixit, intellectum humanum, in cognoscendo abstracta, non esse cæcum, sed cæcipientem. quapropter æternitatem affectat, sed non perfecto appetitu desiderat. Ad verba autem Aristotelis patet responsio per ea, quæ dicta sunt. vniuersaliter enim corpora cœlestia, homines, bestię & plantę, animata sunt, eorumque animę sub vniuersali definitione animę continentur, verum non vno modo. intelligentiæ enim, quæ actuant corpora cœlestia, sunt actus corporis physici organici, sed non, quæ intelligentiæ sunt etiam, & quæ actuant, nihil recipiunt, sed tantum tribuunt. At humana anima simpliciter est actus corporis physici organici, quoniam nullam habet operationem, in qua aliquo

• aliquo modo non dependeat a corpore, etsi non, ut subiecto, saltem, ut obiecto, vnde aliquid recipit a corpore, quod non contingebat in intelligentia, in mouendo corpus. ipsa enim tantum tribuit, & non recipit, sensitiva autem & vegetatiua penitus immersæ sunt materiæ, licet vegetatiua magis, quam sensitiva, quare sunt actus prorsus corporis organici, & ut subiecti, & ut obiecti, hocque recte & ordinate natura instituit. sicut enim ab omnino immobilibus, quæ sunt intelligentiæ, ad corpora cœlestia descendimus, quæ tantum secundum locum mouentur, & hæc neque secundum totum, sed secundum partem, posthæc vero ad generabilia & corruptibilia, quæ & secundum tota, & secundum omnem modum motus, transformantur, sic & intelligentiæ inter omnes animas minime sunt actus corporis organici, deinde humanus intellectus, tertio sensus, quarto vegetatiuus. indigere enim corpore, quoquo modo non absoluitur ab imperfectione, vnde conuenientissimus est iste ordo. Ad id vero, quod de intellectu agente dicebatur, quoniam ipse vere est immortalis, quare & passiuus, quandoquidem ambo hi sunt partes essentielles, vel potestatiuæ, animæ humanæ. hinc dicitur, quod verbum illud magis est in oppositum, quam in propositum, ibi enim dicit Aristoteles, quod so-

lus intellectus agens vere est immortalis, & semper est in actu, passivus vero non, cum quandoque intelligat, & quandoque non. quare, cum perpetuam non habeat operationem, neque perpetuam habet essentiam, unde ad rationem dicitur, quod intellectus possibilis est secundum quid immortalis, sed ipse agens est vere immortalis, cum sit vna intelligentiarum, neque ipse est pars aliqua animæ humanæ, sicut Themistius & Auerroes existimauerunt, sed tantum motor. X Quod autem Aristoteles dixerit, esse partem animæ, verum est, ut anima communis est intelligentiæ & humano intellectui, ex quo non sequitur, quod sit pars animæ humanæ. est enim fallacia consequentis, & hoc est simile ei, quod dicitur de materia prima, nam ipsa est susceptiva, secundum verum esse omnium formarum materialium, intellectus vero tantum secundum esse intentionale, cum lapis non sit in anima, sed eius species, verum, quod educit de potentia ad actum materiam primam, secundum esse formarum, non est aliquid materiæ primæ, neque ei coniunctum secundum esse, sed motor vniuersalis, qui natura agens dici potest, sic intellectus humanus, cum eam proportionem habeat in genere intelligibilem, qualem habet materia prima in genere sensibilem, ut etiam Themistius & Auerroes

con-

constituentur, mouebitur ad suscipiendum omnes species ab aliquo, quod non est pars eius, neque ei coniunctum, & hoc dicitur intellectus agens, sicut, quod vniuersaliter mouet materiam, dicitur mouens naturale, neque verum est, quod subiungit Themistius, scilicet, quod nos sumus intellectus agens, vel, quod sit pars nostri, vt fere forma, sed tantum, vt motor. illa enim copulatio purum figmentum est. Cetera autem, quæ vltius adducebantur, aut non sunt contra positionem, aut per dicta in alio capite sunt soluta, veluti, qualiter intellectus veniat de foris, & remaneat post mortem.

CAPVT XI.

*In quo mouentur tria dubia circa ea,
quæ dicta sunt.*

Circa ea, quæ dicta sunt, non nulla oriuntur dubia.

Primum, quoniam dictum est, animam humanam vere esse mortalem, secundum quid autem immortalem, istud quidem non videtur esse bene dictum, immo, magis dicendum videtur, simpliciter esse immortalem, & secundum quid mortalem, superiora enim continent inferiora,

ra, & non inferiora superiora. dicimus enim, corpora cœlestia continere ista generabilia & corruptibilia, & non e conuerso. quare, cum immortale sit supra mortale, magis dicendum est, animam humanam simpliciter esse immortalem, & secundum quid mortalem, cum immortale contineat mortale, quam dicamus, ipsam esse mortalem simpliciter, & secundum quid immortalem, cum mortale non contineat immortale.

Secundum dubium, quoniam, si anima est immortalis secundum quid tantum, vel igitur vere & proprie est immortalis, vel non vere & improprie, non primum, ut dictum est, neque secundum, quia, si improprie dicitur immortalis, non minus posset dici, quæcunque alia res non sit. nam & improprie posset appellari canis, vel lepus. Cur igitur magis dictum est, quod sit immortalis, quam canis, vel lepus, cum immortale improprie de ea dicatur?

Tertium dubium est, quoniam tota radix huius positionis innititur ei fundamento, scilicet, quod intellectus humanus non habet, nisi vnum, modum intelligendi, sicut & sensus, & intelligentiæ, vnum modum cognoscendi, motus autem ille est medius inter modum cognoscendi abstractorum simpliciter & animæ sensitiuæ, cum de utroque participet. ut enim vniuersaliter cognoscit, conuenit cum

abs.

abstractis, vt vero tale vniuersale non speculatur, nisi in phantasmate, & singulare conuenit cum sensu, cum totaliter non cognoscat, sine materiæ appenditiis, quare concludebatur medius inter materialia. verum hoc dubitationem facit, quoniam, si talis dependentia cognitionis intellectus a phantasmate est, speculari vniuersale in singulari, tunc intellectus cognosceret singulare, quod a multis negatum est. Dicunt enim aliqui, singulare materiale per solum sensum cognosci posse, vel, dato, quod concedamus, intellectum cognoscere singulare, multis tamen videtur, quod, nisi reflexe, cognosci non potest, vt, 3 de anima, tex. 10, videtur dicere Aristoteles. verum, & hoc concesso, cum ista reflexio non potest imaginari, nisi quidam discursus, vt fere omnes interpretantur, qui discursus non fit, nisi in tempore, & post simplicium cognitionem, ergo ante compositionem & diuisionem, & consequenter, discursum, speculari vniuersale, & non in singulari. ergo positio falso innititur fundamento.

In quo ad dubitationes istas respondetur.

CAPVT XII.

AD primam igitur dubitationem dicitur, longe distare continere a participare. continere enim se habet per modum formæ, & contineri per modum materiæ. quare continens est perfectum & super excellens, ipsum autem contentum est imperfectum & excessum. verum e contrario est de participante & participato, participatum namque se habet per modum causæ & excedentis, participans vero per modum effectus & excessi. quare non conuenienter dicimus, intellectum humanum continere diuina & immortalitatem, verum e contra, sed recte dicimus, intellectum humanum participare de diuinitate & immortalitate, & non e contra. quare Aristoteles, i de part. cap. 10, non dixit, solus homo diuinitatem & immortalitatem continet, sed dixit, solus homo diuinitatis & immortalitatis est particeps, vel maxime, quod verbum additum est, quia & cetera mortalia de diuinitate participant. nam in omnibus naturæ numen est, vt idem dicit Aristoteles, ex Heracliti sententia, i de part. cap. vlt. Vtrum cetera mor-

mortalia non tantum, sicut homo. idem quoque repetit 4 de part. cap. 9. quapropter ratio cogebat, quod intellectus humanus immortalitatem non contineret, non autem, quod immortalitatem non participaret, quod ponimus. scias etiam, quod, sicut aliquid vere mortale immortalitatis est particeps, immo, omne productivum sibi similis est sic immortalitatis particeps, sicut dicitur 2 de anima, tex. 34 & 35, ita aliquid immortale mortalitatis & caduci videtur particeps. Commentator enim, 2 de cœlo, comm. 49, reddens causam, de macula lunæ, dicit, esse, quia luna est de natura terræ, citatque Aristotelem lib. de anim. verum manifestius hoc dicit lib. de proprietatibus elementorum. ponit enim, cetera elementa ab aliis erraticis participari. non igitur inconuenit, & mortale immortalis, & immortale mortali, participare.

Ad secundam dubitationem dicitur, quod, etsi inter proprie & improprie non datur medium, tamen per participationem proprietatum datur medium, sicut, licet inter substantiam & accidens non datur medium (nihil enim est, quod non sit vel substantia, vel accidens) tamen aliquid ponitur participare de proprietatibus utriusque, sicut &, moveri, secundum partem ponitur medium inter moveri per se, & moveri per accidens, ut dicitur 5 phys. quare animus humanus, etsi

etsi improprie dicatur immortalis, quia vere mortalis est, participat tamen de proprietatibus immortalitatis, cum vniuersale cognoscat, tametsi eiusmodi cognitio valde tenuis & obscura sit, non sic autem est de cane & lepore, quantum ad istam operationem. Quare obiectio, ibi facta, cessat. Quod si dicatur, nos multum vilificare intellectum humanum, cum ipsum vix vmbra intellectus affirmamus, hinc quidem dicitur, quod vere, comparando ipsum intelligentiis, vmbra est, quod etiam docet Aristoteles, & in erratis de anima, & 2 metaph. Non enim vere appellatur intellectualis, sed rationalis. intellectus enim simplex intuitu omnia intuetur, at ratiocinatio discursu, compositione, & cum tempore, quæ omnia attestantur super imperfectione & materialitate eius. sunt enim hæ conditiones materiæ. Si vero ipsum humanum intellectum comparaueris ad cetera generabilia & corruptibilia, primum gradum nobilitatis obtinebit, quanquam corpus imbecillissimum, & fere infinitis infirmitatibus obnoxium, deteriorisque conditionis, quam sint fere omnes bestię, vt optime Plinius, lib. 7 natur. hist., manifestat. Adde insuper, quod homo vel est subiectus, vel aliis dominatur. si subiectus est, consideret pessimam suam sortem, cum vix de mille millibus dominantibus vnus me-

mediocris virtutis reperiatur, immo, quasi semper in potestate constituti sunt, amentes, ignorantes, omnique vitiorum genere referti, quam dura autem sit huiusmodi fors, satis liquet, cum nullum genus animalium sic ab aliquo suæ speciei premar, si vero aliis dominetur, quam iniqua sit tyrannis, satis abunde & Plato de Repub., & Aristoteles in Polit., declarant, ponuntque, longe deteriorem esse tyrannidis conditionem, quam subiectum quæcunque subiectione. Quicumque igitur tantum magnificat hominem, non consideret ea, quæ non experitur, sed ea, quæ scit & ante oculos habet.

Ad tertiam autem dubitationem dicendum est, quod quidam grauissimi interpretes D. Thomæ, exponentes articulum 7 quæst. 84 primæ partis summæ, vbi de hac conuersione tractat D. Thomas, dicunt, singulare reflexe intelligi, & quod huiusmodi reflexio est quædam argutio, dicuntque, quod vniuersale non cognoscitur in aliquo singulari, verum in aliquo particulari, verbi causa, quod homo non cognoscitur in Socrate, vel in Platone, sed in aliquo homine. aliquis autem homo ad hominem se habet infra terminos primi modi dicendi per se, quamuis non sit primo in tali modo, est tamen infra limites eius, sicut se habent perfectum & imperfectum ad vnamquamque rem, neque homo

homo est prior aliquo homine, cum conuertatur subsistendi consequentia. nam, si homo est, & aliquis homo, & , si aliquis homo est, homo est, quod esse non potest, homo esset prior aliquo homine. hæc autem dicta apud me sunt valde ambigua, & primo quidem, quod homo cognoscitur in aliquo homine, sed non in Socrate, neque in aliquo singulari, istud quidem in primis videtur esse contra experimentum, quoniam, quantumcunque immateriale, vel vniuersale, cognoscamus, semper nobis formamus aliquod idolum in cogitatiua, in quo illud speculamur, vt & D. Thomas ibidem dicit, modo tamen idolum est quoddam singulare & singulariter representans, ratioque ad illud tendit. nam vult probare, nos intelligere per conuersionem ad phantasmata, quod fingi non potest, nisi singulare, quoniam homo est in Socrate, & equus in hoc equo. etenim hæc sunt eius verba, quare ex eo, quod homo est in hoc phantasmate. aliter enim probatio non esset conueniens. non enim ex eo, quod est indifferenter in aliquo homine, cognoscit in hoc phantasmate, & certe huius interpretis dictum literæ contradicit. sic enim stat litera, cognoscit in aliquo indiuiduo, quod manifestat per verba subsequencia. sequitur enim, natura humana est in hoc homine, & equina in hoc equo. Amplius difficilimum est apud

apud me, intelligere illam argumentationem, cum hoc, quod mihi videtur multipliciter deficere; nam, ex primo priorum, omnis vera argumentatio habet aliquam propositionem vniuersalem, quoniam singulare ex singulari infertur, vniuersalis autem propositio inductione habetur, ut 1 & 2 qo 8t. patet. Inductio autem est singularium, ut satis notum est. quare in cognitione singularis præsupponitur singularis cognitio. Amplius, si ad intelligentiam Socratis indigemus illa obscurissima arguitione, quam ipse dicit, tunc magnum tempus apponeretur ad cognoscendum Socratem post hominis cognitionem. ego quoque fateor, me intelligere, Socratem esse hominem, nihilque de illa arguitione intelligo, puerique & idiotæ, discursu carentes, nescirent, hoc esse hominem, & illud canem, cum arguitionem illam non habeant. Præterea aliquis homo secundum ipsum, non est singulare, licet determinet hominem. sed nihil videtur in aliquo homine esse determinatiuum hominis, nisi illud syncategorema (aliquis) quod non videtur, cum in se plus habeat, quam homo, & tamen determinans debet se habere in minus, quam determinatum. Præterea, quod ipse dicit, hominem, & aliquem hominem, esse simul, quoniam mutuo se inferunt, verum eodem argumento, si omnia singularia, contenta sub homine,

ne,

ne, accipiantur eodem modo, sub disiunctione se inferent cum subsistendi consequentia. nemini tamen dubium est, quod homo, secundum intellectum, est prius singulari, quamvis non secundum rem, & de prima est sermo. Porphyrius namque, in communitatibus, probat, genus prius esse differentiis & speciebus, quoniam, sublato genere, nec sunt species, nec differentiae, verum, ipsis sublatis, non aufertur genus, quod equidem intelligi nequit secundum rem, sed tantum secundum intellectum. Quare mihi dicendum videtur, quod intelligit hominem in singulari, indeterminate tamen, quoniam, etsi nunc intelligo hominem in Socrate, possum tamen & in Platone, & in quouis alio, dummodo sit in aliquo singulari, sicut omne corpus est in vno loco singulari, indeterminate tamen, diciturque, quod simul tempore cognoscit vniuersale & singulare, licet prius natura vniuersale. quamquam non desint, qui, singulare prius intelligi, affirmant, &, vt existimo, nedum natura, verum & tempore, cum ponant, vniuersalis cognitionem per comparationem singularium haberi. verum pro nunc cum prima opinione transeamus. Cumque dicebatur, quod singulare non cognoscitur, nisi reflexe, ex 3 de anima, quamvis Themistius & Auerroes sic illa verba non interpretatur, verum, hoc nunc concesso,

cessio, dicimus, vere & proprie talem intellectiōem esse reflexionem & conuersionem ad phantasmata, vt verbis D. Thomæ utar, quod apertum est videre, num. 8 de physico auditu, in ea parte, in qua ostendit, motus reflexos non continuari. definit, motum reflexum eum esse, qui in idem terminatur, a quo incepit, verum, cum anima humana per cogitatiuam comprehendit singulare primo, deinde eadem per intellectum vniuersale comprehendat, quod tamen in eodem singulari speculatur, quod per phantasiam cognitum est, vere reditum facit, & per consequens conuersionem, quoniam, ex singulari, per phantasiam cognito, eadem anima per intellectum ad idem redit, neque satis video, quomodo syllogismus, vel argumentatio, reflexio, vel conuersio, commode nuncupari possunt, cum non ex eodem in idem, verum ex diuerso in diuersum, procedant, eademque specie vtrumque comprehenditur, licet non æque primo, neque inconuenit, plura simul intelligi, dum per vnā speciem intelligantur, magis autem hoc, quam illud, singulare comprehendit, quoniam huius est phantasma, non illius. etenim, ex huius leonis inspectione, leonem, & hunc leonem, intelligo, non tamen magis leonem, ex hoc, quam ex illo, qui moratur in syluis. etenim, si illum inspicerem, non minus leonem intelligerem, verum hunc

hunc intelligo, & non eum, qui in syluis,
quia huius, & non illius, phantasma habeo.
quare fundamentum stat.

CAPVT XII.

*In quo multa ardua difficultates mouen-
tur aduersus id, quod dictum est.*

VERUM, aduersus positionem hanc ma-
iores difficultates insurgunt, quibus,
quantum video, satisfacere, non leue est.

Primo, quia, si anima humana est mor-
talis, quemadmodum conclusum est,
tunc non dabitur vltimus finis hominis,
quia homo est, & sic non erit felicitabilis,
sed huius oppositum ponitur ab Aristo-
tele, 1 ethic., vt satis liquet. Est etiam
contra commune dictum, vbi dicitur,
quod homo est animal felicitabile, cum
sit rationis capax, quod etiam patet ex
suo opposito, cum, 2 phys., diffortunium,
seu infelicitas, non cadit in bestias, sed
tantum in rationalia. ergo anima non est
mortalis. Omnia patent, excepta condi-
tionali, quæ est maior propositio, scilicet,
quod, si esset mortalis, non esset vltimus
finis hominis, quæ sic pro-
batur, quoniam, si quis esset vltimus finis
talis

talís cum in parte vegetatiua & sensitiua neque in bonis corporis, vel fortunæ, poni possit, vt satis stricte Aristoteles, 1 ethic., demonstrat, & Boetius copiose, 2 & 3 de consolatione, & D. Thomas, lib. 3 contra Gentiles. Ergo in bonis animi, seu eius virtutibus, poneretur eius felicitas. Verum, cum virtutes animi diuidantur in morales & intellectuales, & in moralibus felicitas poni non possit, vt citati viri lucide ostendunt, restat, quod intellectualibus. Diuisis autem intellectualibus in suas partes, vt 6 ethic. patet, in nulla videtur rationabiliter poni posse felicitas, præterquam in habitu sapientiæ, quæ præcipue de Deo contemplatur, sicut plana videtur Aristotelis sententia, 10 ethic. Sed & hoc ex multis rationibus refellitur. Primo quidem, quoniam talis cognitio exigit hominem valde excellentis ingenii, & præter hoc totaliter abdicatum a rebus mundanis, bonæ naturæ, scilicet sanæ, & non indigentem necessariis. verum tales rarissimi esse possunt, etiam in longis sæculis vix vnus reperitur, quod docet quotidiana experientia, & historiæ declarant, hoc autem repugnat rationi felicitatis, quia est bonum conueniens cuilibet homini non orbato, cum quilibet homo naturaliter eam desideret. Amplius, quoniam talis cognitio valde debilis est, & multum incerta, cum magis sit opinatiua, quam scientifica, quod declarant diuersæ opiniones, cum vix duo in talibus reperiuntur consentientes, no-

E

ster-

sterque modus intelligendi idem demonstrat, qui est per sensus, & talia remotissima sunt a sensibus, quo fit, ut magis ignorantia, quam cognitio, & suspicio, quam certitudo, debeat appellari. quis autem hanc ponet esse felicitatem, cum in felicitate quiescimus, in hac vero titubamus & non quiescimus? Insuper felicitas rationem habet termini, hæc vero tota est in via, cum nullus tantum scit, quantum scire potest, immo, quanto magis scit, tanto magis scire desiderat. Præterea ad istam capeffendam, quot artes, quot scientiæ, quot labores, quot vigiliæ sunt requisitæ. quare, cum vix vita sufficiat, pro vna arte capeffenda, quomodo ad talem finem peruenire poterit? Cumque quis intuebitur, quam incertus sit de vita sua, de viribus suis, de eventibus, potentibus eum impedire & tollere eum de medio, quomodo tantum & tam difficile iter aggreditur? Amplius, cum tempus generationis talis felicitatis sit maximum, viaque perueniendi difficilima. Oportet enim hominem se quasi totum abdicare a corpore, cum sit in corpore, & dubius est de euentu, & etiam, postquam pervenerit, in momento eam amittere, vel moriendo, vel ex aliquo alio casu. quomodo igitur ista non verius nuncupabitur infelicitas, quam felicitas? Quare non irrationabiliter multi dixerunt, si anima humana mortalis est, longe deteriorem esse conditionem hominis, quam bestię cuiusvis, inspecta hominis

im-

imbecillitate, quantum ad corpus, quod tot^o infirmitatibus est subiectum, & animi inquietudine, qui semper huc atque illuc vertitur.

Secundo, quia, stante animi humani mortalitate, homo in nullo casu, quantumcunque urgentissimo, deberet eligere mortem, & sic remoueretur fortitudo, quæ præcipit, contemnere mortem, & quod pro patria & bono publico debemus mortem eligere, neque pro amico deberemus exponere animam nostram, immo, quodcunque scelus & nefas perpetrare magisque mortem subire, quod est contra Aristotelem, 3 ethic. & eiusdem, & contra naturam, cuius signum est, quod naturaliter odimus ista facientes, etiam pro eorum vita tuenda, eosque vituperamus, naturaliter autem contraria facientes amamus & laudamus. Quod autem hoc sequatur, satis patet, quia electio habet rationem proprii boni, modo mors totum bonum destruit, nihilque in ea est eligibilis, quod etiam patet ex Platone in Phædone, ubi testatur, mortem æquo animo non esse ferendam, nisi spes esset de meliori vita, dicit quoque, 5 de legibus, qui hanc vitam summum bonum censet, eam dedecorat. D. Thomas etiam, 3 ethic., quasi dubitat, quomodo ponentes, animam esse mortalem, possunt eligere mortem, & in expositione symboli Apostolorum, dicit, super parte illa (carnis resurrectionem) quod procul dubio, nisi esset spes resurrectionis, quod-

cunque flagitium esset potius perpetrandum, quam moriendum.

Tertio, quia sequitur, aut Deum non esse gubernatorem Vniuersi, aut iniquum, quorum vtrumque scelus est. Nam, si non omnia gubernaret, non esset Deus, & si Deus, summum bonum, cum nihil potentialitatis habeat, & si summum bonum, quomodo in eo iniquitas? Hoc autem apertum est, videre, quia tot mala in hoc mundo sunt, quae ignota hominibus sunt, & si nota, impunita reliquuntur, immo, saepe pro malo maxima bona reportant, e contra de bonis, qui vel non cognoscuntur, vel, si cognoscuntur, remanent sine praemio, & multoties mortem & damna sustinent. haec autem vel non cognoscit Deus, vel, si cognoscit, & sic impunita, vel sine praemio, relinquat, sicut dicit Hieronymus, Deus non est.

Quarto, quia omnes leges, tam, quae fuerunt, quam, quae sunt, ponunt, animam post corpus remanere, & sic hoc est maximum famosum & in toto orbe celebratum. quare vel oportet dicere, animam esse immortalem, vel, quod totus mundus decipitur, famosumque ex toto esset falsum, quod tamen Philosophus, in de somno & vigilia, negat.

Quinto, quia multa sunt experimenta, per quae euidenter comprehendi potest eius immortalitas. Plato namque, in Phaedone, refert, quod circa monumenta visa sunt phan-

phantasmata vmbrosa animarum, & hæc sunt animæ malorum hominum. dicit etiam, 9 de legibus, occisorum animas sæpe interfectores hostiliter insequi, propter quod aliqui existimauerunt, ad præsentiam interfectoris vulnera sanguinem emittere. refert quoque, 10 de Repub., quendam Pamphilum a mortuis surrexisse, qui de pœnis & malorum cruciatibus horrenda referebat. Plinius quoque, iunior, narrat, Athenis infamem fuisse domum, in qua & simulacrum horridi senis aspiciebatur, & strepitus audiebatur, atque Athenodorum, Tarsensem philosophum, simulacrum illud vidisse conductâ domo, eoque duce comperisse, in area domus sub terra, ossa incerta catenis, &, sicut mos erat, sepelisse, domum deinde illam a strepitu liberatam. refertque Possidonius, Stoicus, quod duo quidam Arcades familiares, cum Megaram venissent, alter ad hospitium, qui, ut cœnati quieverunt, nocte visus est in somnis ei, qui erat in hospitio, ille alter orare, ut subveniret, quod sibi a caupone interitus pararetur. hic, primo territus somno, surrexit, deinde, cum se collegisset, idque visum pro nihilo habendum, duxisset, recubuit, tum ei dormienti ille idem visus est rogare, ut, quoniam sibi viuo non subvenisset, mortem suam saltem ne inultam esse pateretur, se, interfectum a caupone, in plaustrum esse coniectum, & supra sterqus iniectum. petere, ut mane adesset ad portam, priusquam

quam plaustrum ex oppido exiret. hoc ergo somnio commotus, mane bubulco præsto ad portam affuit, quæsiuit, quid esset in plaustro, ille, perterritus, fugit, mortuus erutus est, caupo, re patefacta, pœnas dedit. Simonides quoque, cum ignotum quendam proiectum mortuum vidisset, eumque humasset, haberetque in animo nauem conscendere, moneri, visus est, ne id faceret, ab eo, quem sepultura affecerat, si nauigasset, naufragio periturum. rediit Simonides, ceteri naufragium fecerunt. infinitaque huiusmodi adduci possent. Testor ego quoque, me multa per somnia habuisse, quæ quasi consilia sunt. quare, animas defunctorum esse, aperte hæc videntur declarare.

Sexto, quia multa leguntur, & experientia sentiuntur, quod quidam a dæmonibus vexantur, qui & præterita, & futura, prænuntiant, referuntque, se esse animas aliquorum defunctorum. experimenta autem negare, est impudentiæ & vesaniæ.

Septimo, quia & Aristoteles videtur ponere animas immortales, tum, quia, iEthic., dicit, pronepotum infortunia aliquid facere ad animas defunctorum, tum, quia ponit, eas præmiari post mortem. Nam, lib. 2 œconom. cap. 2, sermonem faciens de Alceste & Penelope, dicit, quod, factæ in malis fideles, sibi præparauerunt gloriam immortalem, & iuste a viris honoratæ sunt, neque a Diis sunt immeritæ.

Octauo, quia omnes huius sententiæ sectato-

Statores fuerunt & sunt viri impiissimi & scelestissimi, sicut Epicurus ignauus, flagitiosus Aristippus, insanus Lucretius, Diogoras, dictus Athenis Epicureus, bestialissimus Sardanapalus, & omnes, quorum conscientia premitur a flagitiosis criminibus, at contra viri sancti & iusti, quorum immaculata est conscientia, asseueranter eam immortalem pronuntiant. Quare Plato, epist. ad Dionysium, quæ incipit, Audiui ex Archedemo, ubi sic dicit. Fit enim natura quædam, ut ignauissimi homines nihil curent, quæ sit de ipsis futura opinio, probatissimi autem viri cuncta faciunt, quo in futuris seculis bene de se loquentes homines audiant, quam ego coniecturam facio, esse aliquem sensum his, qui mortui sunt, rerum nostrarum, quoniam optimi animi sic forte diuinant, deterrimi nequaquam, validiora vero sunt diuinorum virorum præfagia, quam aliorum.

In quo ad obiecta respondetur.

CAPVT XIV.

ARduum quippe & onerosum mihi videtur his argumentationibus satisfacere, & eo præsertim, quoniam famosum est, animam post mortem remanere, &, ut, & metaph., scribitur, difficile est, contra consuetudinem loqui, verum, quantum dabitur facultas in materia, saltem probabiliter dicere conabimur.

Pro responsione igitur ad primum, sci-

endum est, quod vnaquæque res, saltem perfecta, habet aliquem finem, cumque finis boni rationem obtineat, vt dicitur 2 *Metaph.*, non tamen, quod est magis bonum, det vnicuique rei pro fine assignari, sed solum secundum quod conuenit illi natura & ei proportionatur. Nam, etsi, sentire, melius est, quam, non sentire, non tamen lapidi conuenit, sentire, neque esset bonum lapidi. sic enim non amplius esset lapis. quare, assignando finem homini, si talem, qualem Deo & intelligentiis, assignaremus, non conueniens foret assignatio, quandoquidem sic non esset homo. Secundo accipiendum est & maxime memoriz mandandum, quod totum genus humanum vni singulari homini comparari potest, in vno autem indiuiduo humano sunt multiplicia & diuersa membra, quæ & ad diuersa officia, siue diuersos fines proximos, sunt ordinata, cum hoc tamen, quod omnia ad vnum finem deputata sunt. quare omnia illa in aliquibus debent communicari. quod si ordo iste præuaricaretur, aut homo non esset, aut incommode. omnia vero membra ordinantur in communem vtilitatem ipsius hominis, & aut vnum est necessarium altero, & e contra, aut saltem vtile, licet aliquando & illud magis, illud vero minus, vnde cor necessarium est cerebro, & cerebrum cordi, corque necessarium est manui, manus vero vtilis cordi, & dextera vtilis sinistræ, & sinistra dextræ, omniaque

aque membra communicant in vita & naturali calore, indigentque spiritu & sanguine, sicut ex libro de animalibus apertum est videre, vltraque hæc in quibus communicant, singulum membrum singulare habet officium. Cor enim vnum, cerebrum alterum, hepar aliud, & sic de residuis, vt eodem lib. de anim. declarat Aristoteles, verum copiosius Galenus, libro de vtilitate particularum. hæc autem officia, siue opera, non sunt æqualia, verum vnum prius, & alterum posterius, vnum perfectius, & alterum imperfectius. Nam, secundum Aristotelem, cum cor sit nobilissimum & primum, ideo officium eius est nobilissimum & primum, & sic de reliquis discurrendo, & quantumcunque cerebrum, verbi causa, non sit ita perfectum, sicut cor, in suo tamen genere potest esse perfectum. quare, sicut omnia membra inter se habent latitudinem & diuersitatem, ita vnumquodque genus membri, infra tamen certos terminos. etenim, neque omnia corda sunt æque magna, vel consimiliter calida, & sic de residuis membris illud quoque observandum est, quod, quantumcunque inter ista membra sit tanta diuersitas, non tamen ea est talis, vt discordiam pariat, sed debet esse commensurata diuersitas. quod si vltra modum fiat, aut perditio indiuidui, aut ægrotudo, consequitur, si etiam non esset illa commensurata diuersitas, indiuiduum minime constare posset. Etenim, si omnia membra essent

aut cor, aut oculus, animal non esset, veluti in symphoniis & concentibus, si omnes voces essent vnus ordinis, non causeretur concentus & delectatio, taliterque disposita sunt, vt neque vniuersum indiuiduum, neque aliqua eius pars, meliori modo potest esse disposita, quam fit, sicut Plato, in Timæo, dixit, quod Deus dedit vnicuique, quod optimum sibi & vniuerso. Eodem itaque pacto censendum est de toto genere humano. Vniuersum namque humanum genus est sicut vnum corpus, ex diuersis membris constitutum, quæ & diuersa habent officia, in communem tamen vtilitatem generis humani ordinata, vnumque tribuit alteri, & ab eodem, cui tribuit, recipit, reciprocaque habent opera, neque omnia possunt esse æqualis perfectionis, sed quibusdam data sunt perfectiora, hæcque inæqualitas si tolleretur, aut genus humanum periret, aut non incommode constaret. habent tamen alia, in quibus omnia, aut fere omnia, communicant. Secus enim non essent partes vnus generis, & ad vnum commune bonum tendentia, sicut de vnus singularis hominis membris dicebatur. Neque inæqualitas inter homines, commensurata tamen, debet discordiam parere, immo, sicut in symphonia vocum commensurata diuersitas concentum delectabilem facit, sic commensurata diuersitas inter homines perfectum, pulchrum, decorum & delectabilem, generat, incommensurata
vero

vero contrarium. His igitur sic digestis, dicamus, quod omnes homines, ad huiusmodi finem communem consequendum, debent in tribus intellectibus communicare, scilicet speculatio, practico, & factiuo. Nullus enim homo est, non orbatus, & in ætate debita constitutus, qui aliquid horum trium intellectuum non habeat, veluti nullum est membrum, quod sanguine & calore naturali non participat. Vnusquisque etenim homo habet aliquid de speculatione, & forte in vnaquaque scientia speculatiua, quia saltem principia, quæ, vt 2 metaph. dicitur, sunt sicuti ianux domus, quas nullus ignorat. Quis enim est qui prima principia ignoret, veluti de quolibet dicitur esse, vel non esse, non contingit idem simul esse, & non esse? quis omnino Dei ignarus, entis, vnius, veri, boni? & sic de reliquis, quod nimis onerosum esset percurrere. hæc autem ad Metaphysicam pertinent. De naturali quoque manifestum est, cum ista subiaceant sensibus, quæ primo intellectui occurrunt. in Mathematica quoque illud clarum est videre, cum sine numeris & figuris vita humana duci non possit, omnesque homines, horas, dies, menses & annos, cognoscunt, multaque alia, quæ sunt Astronomici negotii, non minusque; nisi cæcus sit, aliquid de visionibus cognoscit, quod est opus Perspectiuæ, nisi que surdus sit, de concentibus, quod ad Musicam spectat. quid dicam autem de Rhetorica &

Dialectica? quandoquidem Aristoteles, in proœmio Rhetoricæ, dicat, propter quod & modo quodam omnes participant ambabus. De intellectu autem operatiuo, qui est circum mores, respublicas, & res domesticas, illud quidem apertissimum est, cum unicuique datum sit, bonum & malum cognoscere, esse partem ciuitatis & familiæ. Etenim, huiusmodi intellectus vere & proprie humanus nuncupatur, vt Plato, in de Republica, & Aristoteles, in Ethicis, testantur. de factiui autem intellectu illud in propatulo est, quandoquidem nullus homo sine hoc vitam degere potest. Etenim, sine mechanicis & necessariis ad vitam, homo non potest durare. verum scire, oportet, quod, tametsi vnusquisque homo de tribus enumeratis intellectibus ex toto non priuetur, non tamen homo æqualiter se habet ad hos. Nam speculatiuus intellectus non est hominis, sed Deorum, vt tradit Aristoteles, 10 Ethic., & Plato, in Timæo, maximum donum Deorum est Philosophia, quare nullo pacto in hoc homo cum ceteris mortalibus communicat. Ideo, etsi homines omnes aliquid huius habent, exacte tamen & perfecte paucissimi & habent, & habere possunt, propter quod contingit, quod ea pars generis humani, quæ se totam speculationi tradit, eam proportionem tenet in genere hominum, quam cor in genere membrorum, quanquam & latitudo modorum sit, vt quidam mathematici, quidam phisici, qui.

quidam medici, quidam vero metaphysici, sint, interque omnes istos modos est latitudo, sicut satis liquet. intellectus autem factivus, qui infimus & mechanicus est, omnibus quidem hominibus est communis, immo, & bestiae hoc participant, ut docet Aristoteles, 1 de hist. animal., cum multae bestiae casas construunt, multaue alia, quae intellectum factivum praeferunt, hincque maxime necessarius est, adeo, ut maior pars hominum circa hunc detenta sit, quare femineus sexus fere ex toto huic incumbit, ut, texere, filare, suere, &c. maximaque hominum pars agriculturæ vacat, deinde diuersis artificiis, neque, qui vni incumbit, alteri artificio commode incumbere potest. quapropter Plato, in de Repub., & Aristoteles, in Polit., iusserunt, ut, quemadmodum vnum membrum commode non exercet diuersa officia, sic nec vnus artifex diuersis artificiis vacare debet. neutrum enim consequetur. operativus autem intellectus, vere conuenit homini, & vnusquisque homo, non orbarus, perfecte eum consequi potest, & secundum eum simpliciter & absolute homo dicitur bonus, & malus, secundum vero speculativum & factivum, nisi secundum quid, & cum determinatione. Secundum namque virtutes & vitia, homo dicitur bonus homo, & malus homo, at bonus metaphysicus non bonus homo dicitur, sed bonus metaphysicus, bonusque domificator non bonus absolute, sed bonus domifi-

cator, nuncupatur. quapropter homo non indigne fert, si non metaphysicus, physicus, vel faber, appelletur, at, si fur, intemperatus, iniustus, imprudens, vel aliquid huiusmodi vitiosum, dicatur, maxime indignatur & excandescit, tanquam, esse studiosum, vel vitiosum, humanum sit, & in nostra potestate repositum. At, esse Philosophum, vel domificatorem, non nostrum est, neque homini necessarium. Quo fit, ut omnes homines possint & debeant esse bene morigerati, non autem omnes philosophi, mathematici, domificatores, &c. Neque enim constaret genus humanum, nisi esset tanta diuersitas, sicut supra de membris dictum est. Redeunt igitur ad propositum, dicimus, quod finis generis humani in vniuersali est, participare de illis tribus intellectibus, secundum quos etiam homines inter se communicant & viuunt, & vnus alteri aut est utilis, aut necessarius, sicut omnia membra in vno homine communicant in spiritu vitali, & habent operationes mutuas inter se, & ab hoc fine homo absolui non potest, verum, quantum ad intellectum practicum, qui proprie hominis est, quilibet homo perfecte debet habere. Ad hoc enim, ut genus humanum recte conseruetur, quilibet homo debet esse virtuosus moraliter, & quantum possibile est, carere vitio, sibi que imputatum est vitium, tanquam suum, in quocunque statu reperitur, siue egenus, siue pauper, siue diues, siue

me.

mediocris, siue opulentus. De aliis autem intellectibus non est necessarium, immo, neque possibile, neque conuenit generi humano. Non enim constaret mundus, si quilibet esset speculatiuus, immo, neque ipse, cum impossibile sit, vnum genus hominum, utpote physicum, sibi esse sufficiens, neque esse tantum domificatorum genus, vel aliquid huiusmodi, neque fieri potest, ut vnum perfecte exerceat opera alterius, nedum omnium, sicut contingit in membris. quare vniuersalis finis generis humani est, secundum quid de speculatiuo & facti-
uo participare, perfecte autem, de practico. Vniuersum enim perfectissime conseruaretur, si omnes homines essent studiosi & optimi, sed non, si omnes essent philosophi, vel fabri, vel domificatores, neque ita est in virtutibus moralibus, sicut in artibus & scientiis, quod vna impediatur aliam, & incumbere vni, impediatur, incumbere alteri, verum, ut dicitur in ethicis, virtutes morales sunt connexæ, & qui perfecte habet vnum, habet omnes. quare omnes debent esse studiosi & boni, esse vero philosophum, mathematicum, architectum, sunt fines partiales, sicut cerebrum habet proprium officium, & hepar suum, neque ista inæqualitas in genere humano debet parere inuidiam & lites inter ea, sicut neque diuersitas in membris, immo, vnionem & pacem, maxime, cum quilibet debet esse moralis, a quo talia relegata sunt, & sicut vnumquodque
ele-

elementum secundum totum categorice est debite situatum, aliqua tamen pars ipsius melius, quam alia. Non enim quælibet pars ignis tangit sphaeram lunæ, nisi, ut toti coniuncta est, neque quælibet pars terræ est centrum mundi, nisi, ratione totius, ita, non quilibet habet ultimum finem, qui conuenit parti, nisi, ut pars generis humani, sufficit autem, habere communem finem humanum. quapropter ad rationem dicitur, quod si homo mortalis est, quilibet homo potest habere finem, qui vniuersaliter conuenit homini, qui tamen competit parti perfectissimæ, non potest, neque conuenit. sicut non quodlibet membrum potest habere perfectionem cordis & oculi, immo, non constaret animal, sic, si in quolibet homo esset speculatiuus, non constaret communitas humana. quare & plura climata, & diuersæ regiones sunt necessariæ. felicitas igitur non stat in habitu speculatiuo per demonstrationem, tanquam conueniens vniuersaliter generi humano, sed tanquam primæ parti principali eius, & quantumcunque ceteræ partes ad talem felicitatem peruenire non possint, non tamen ex toto priuantur felicitate, cum aliquid speculatiui, & aliquid factiui, habere possint, perfecteque practici, qui habitus quasi vnumquemque beatificare potest. Agricola enim, vel faber, egenus, vel diues, si moralis sit, felix nuncupari potest, & vere nuncupatur, sorteque sua contentus, abit, cum hoc

hoc, quod etiam, præter felicitatem moralem, potest appellari felix agricola, vel felix domificator, si feliciter in agricultura operetur, vel in construenda domo, licet non tam proprie propter hoc felix nuncupetur. Hæc enim non sunt in potestate humana, sicut virtutes & vitia. non igitur genus humanum a suo fine frustratur, nisi seipsum talem faciat, &, quod ulterius addebatur, quoniam talis speculatio non videtur posse facere hominem felicem, cum sit valde debilis & obscura, huic dicitur, quod, tamen si in ordine ad æterna huiusmodi sit, & ad eam, quæ intelligentiarum, tamen inter res morales nihil excellentius haberi potest, sicut Plato, in Timæo, dixit, neque mortalis immortalem felicitatem appetere debet, quoniam immortale mortali non convenit, sicut ira immortalis non convenit homini mortali, ut, 2 rhetor., dicit Aristoteles. quare primo supposuimus, quod unicuique rei proportionatus finis assignetur. Si enim homo sit temperatus, non impossibilia appetet, neque, si conveniunt. talem enim habere felicitatem, est proprium Deorum, qui nullo modo a materia & transmutatione dependent, cuius oppositum contingit in humano genere, quod est medium inter mortalia, &, cum ulterius dicebatur, quia finis debet quietare, hoc autem hominis intellectum & voluntatem non quietare, hinc dicitur, quod Aristoteles, in fine ethic., non ponit felicitatem humanam tanquam

quam perfecte quietantem, immo, ponit, quod, quantumcunque homo sit felix, non tamen tam stabilis est, quin multa perturbent ipsum, non enim esset homo. verum non remouent a felicitate, sicut non quivis ventus evellit arborem, licet moueat folia. quare, in humana felicitate, sufficit stabilitas non remouibilis, licet aliququaliter turbabilis, immo, quod plus est, & in quacunque ætate. In iuuenili enim, si exactam non habet cognitionem, quæ in virili congruit, dummodo habeat iuuenili congruentem, contentus est, pro illa ætate, neque amplius appetit, quam sibi conueniat, quare neque angustabitur, vt dicebatur, &, cum vltcrius procedebatur, quod nunquam tanta scit, quanta scire potest, nec tam clare, quin clarius, dico, quod hoc non tollit felicitatem eius, dummodo tantum habeat, quantum sibi pro illo statu conuenit, & ex parte sui non deficiat. Nam temperati appetitus est, tantum appetere, quantum diligere potest. ita temperati est, contentari eo, quod sibi conuenit & habere potest. Et, cum vltcrius adiungebatur, cum homo sciat, se cito amissurum scientiam, &, quod multis modis auferri potest, magis sibi erit miseria, quam felicitas, hinc dicitur, quod illiberalis hominis est, non velle restituere, quod gratis accepit, cum homo præsupponitur mortalis. Nam & purgatoriam antiqui appellauerunt, cum ea lege receperit, vt sciat, naturæ concessuram, gratias Deo & na-

naturæ aget, semperque erit paratus, mori, neque mortem timebit, cum vanus sit timor de ineuitabilibus, nihilque mali conspiciat in morte. Cumque ulterius inferebatur, quod hominis conditio longe peior esset quocunque bruto, certe, mea sententia, hoc non est philosophice dictum, cum opera bestialia, quantumcunque quietia, in suo genere supponantur inquieta in genere intellectualium. quis mallet, esse lapidem, vel ceruum, longæ vitæ, quam hominem, quantuncumque vilem? cum hoc, quod vir prudens, in quolibet statu & tempore, potest ferre animum quietum, quamvis a tribulationibus corporeis vexaretur, immo, vir sapiens magis eligeret, se esse in extrema necessitate, & in maximis tribulationibus, quam, esse insipientem, ignaum & vitiosum, in dispositione contraria neque verum est, quod, videns immensos labores, abdicationem a voluptatibus corporalibus, obscuram agnitionem de rebus, facilem amissionem acquirentium, magis declinaret ad vitia & corporalia, quam moueretur ad acquirendam scientiam, si vir iste secundum rationem operatur. Nam quæcunque modica particula scientiæ & virtutis præponenda est omnibus delectationibus corporalibus, immo, & regnis ipsis, in quibus superabundant tyrannides & vitia. Quare primum argumentum non videtur convincere, animam esse immortalem.

Ad secundum, in quo inferebatur, quod,
possi-

posita mortalitate animæ, tunc nunquam debeamus eligere mortem, huic dicitur, minime illud sequi, verum magis oppositum. nam, 3 Topic., dicitur, de duobus malis minus est eligendum, &, 3 ethic., electio est bonorum, renuere autem malorum. Cum igitur, in eligendo mortem pro patria, pro amicis, pro vitio evitando, maxima virtus acquiratur, aliisque multum profit, cum naturaliter homines huiusmodi actum laudent, nihilque pretiosius & felicius ipsa virtute, ideo hoc maxime eligendum est. At, scelus perpetrando, communitati maxime nocet, quare & sibi, cum ipse pars communitatis sit, vitiumque incurrit, quo nihil infelicius, cum desinat esse homo, ut Plato pluribus locis, in de republica, dicit. ideoque hoc habet rationem fugibilis. Ad adeptionem etiam illius virtutis sequitur felicitas, vel magna pars felicitatis, etsi parum duratura. At, ad peccatum illud sequitur miseria. Nam, teste Platone, vitium miseria est, & tandem mors, cum, propter commissum scelus, non sequatur immortalitas, nisi forte secundum infamiam & vituperium. sed manifestum est, minus malum esse primum, quam secundum, neque, magnum tempus vivere cum infamia, est proponendum vivere tempore parvo cum laude, sicut vita hominis, quantuncumque brevis, est proponenda vitæ bestiarum, quantumcunque diuturnæ. Nam Aristoteles, 1 ethic., dicit, vitam longævam non præferendam esse vitæ breui,

ui, nisi cetera sunt paria, neque per se in tali casu mors eligitur, cum nihil sit, verum actus studiosus, licet ad eum sequatur mors, sicut, non committendo vitium, non renuitur vita, cum in se sit bona, sed vitium renuitur, ad cuius perpetrationem sequitur vita. Quod vero dicitur de dicto in Phædone, Plato, in de republica, & Critone, ponit, quod, sicut vita cum infirmitate incurabili est renuenda, immo, e viuis auferenda, sic anima cum peccato extirpanda est, anima-que, si æterno viueret in peccato, summa miseria est, quandoquidem ipsi animæ nihil deterius est ipso vitio, verum illud dixit Plato, quantum ad id, quod de facto contingeret. Si enim homines non sperarent meliorem vitam post mortem, iniquissimo animo sine dubio eam tolerarent, quia ignorant excellentiam virtutis & ignobilitatem vitii. Soli enim Philosophi & studiosi, ut dicit Plato, in de republica, & Aristoteles, 6 ethic., sciunt, quantam delectationem generent virtutes, &, quantam miseriam ignorantia & vitia, immo, Socrates, in Apologia, quam Plato scripsit, dicit, siue animus mortalis sit, siue immortalis, nihilo minus contemnenda est mors, neque aliquo pacto declinandum est a virtute, quicquid accidat post mortem. eodem quoque modo, existimo, interpretanda esse dicta D. Thomæ super Symbolo Apostolorum, non, quod scelera sint potius committenda, quam mors subeunda, si anima esset mortalis (illud nam-

namque neque sapienter, neque theologicè dici, censeo) sed, quod homines, non cognoscentes excellentiam virtutis & foeditatem vitii, omne scelus perpetrarent, priusquam mori. quare, ad refrenandum diras hominum cupiditates, data est spes præmii & timor punitionis. quod etiam, supposita animorum mortalitate, in aliquo casu subeunda sit mors, manifestant multæ operationes bestiarum, in quibus, non est dubium, animas mortales esse, atque instinctu naturæ duci. refert namque Aristoteles, 6 de hist. cap. 30, quod Virgilius noster, 4 Georg., commemorat, apes, pro sui ducis tutela & reipublicæ, morti se exponere, scribitque ibidem, marem pro vxore tuenda mortem subire, refertque, eodem lib. 9 de hist. c. 37, camelum, morsu defixo, camelarium interemisse, quod ipsum dolo cum matre coire compulisset, equumque, eodem modo deceptum, idem scelus perpetrasse, at, ubi rem cognouit, se præcipitem interemisse. hæc autem cum natura fiant, secundum rationem facta sunt, quandoquidem, ex Themistii & Auerrois sententia, natura dirigitur ab intelligentia non errante. non ergo & in homine hoc est contra rationem.

Ad tertium, cum inferebatur, aut Deum non esse vniuersorum gubernatorem, aut iniquum, huic dicitur, neutrum sequi, diciturque, nullum malum esse essentialiter impunitum, neque bonum essentialiter irremuneratum esse. Pro quo sciendum est, quod

quod præmium & pœna duplex est, quoddam essentiale & inseparabile, quoddam vero accidentale & separabile. præmium essentiale virtutis est ipsamet virtus, quæ hominem felicem facit. Nihil enim maius natura humana habere potest ipsa virtute, quandoquidem ipsa sola hominem securum facit & remotum ab omni perturbatione. Omnia namque in studioso consonant, nihil timens nihil sperans, sed in prosperis & aduersis vniformiter se habens, sicut dicitur in fine 1 Ethic., & Plato, in Critone, dixit, viro bono, ueque viuo, neque defuncto, potest aliquod malum contingere. Ad oppositum modo de vitio. pœna namque vitiosi est ipsum vitium. quo nihil miserius, nihil infelicius, esse potest. quod autem perversa sit vita vitiosi & maxime fugienda, manifestat Aristoteles, 7 ethic., vbi ostendit, quod vitioso omnia dissonant, nemini fidus, neque vigilans, neque dormiens, quiescit, diris corporis & animi cruciatibus angustiat, vita infelicissima, adeo, quod nullus sapiens, quantumcunq; egenus, corpore infirmus, a bonis fortunæ destitutus, eligeret vitam tyranni, vel alicuius potentis vitiosi, malletque sapiens in sua dispositione permanere. itaque omnis virtuosus virtute sua & felicitate præmiatur. Quare Aristoteles, 30 particula problematum, problemate 10, quo quærit, cur in certaminibus apponuntur præmia, at non in virtutibus & scientiis? dicit, hoc ideo contingere,

re,

re, quoniam virtus ipsa est sibi præmium. Nam, cum præmium debeat esse præstantius certamine, nihilque prudentia potest esse præstantius, sibi ipsi præmium est. At contrarium de vitio contingit, ideo nullus vitiosus impunitus relinquitur, quandoquidem vitium ipsum sibi vitioso sit poena, præmium autem, vel poena, accidentales sunt, quæ separari possunt, ut aurum, vel damna, qualiacunque sint, & sic non omne bonum remuneratum est, & omne malum punitum, neque hoc inconuenit, cum accidentalia sunt. Scire tamen oportet hic duos, primum, quod accidentale præmium longe minus est poena essentiali. Poena namque accidentalis est poena damni, essentialis vero poena culpæ, at poena culpæ longe minor est poena essentiali. Poena namque accidentalis est poena damni, essentialis vero poena culpæ, at poena culpæ longe deterior est poena damni. quare nihil refert, si quandoque essentialis relinquitur, dummodo essentialis remaneat. Secundo adhuc sciendum, quod, quando bonum accidentaliter præmiatur, bonum essentialis videtur diminui, neque remanet in sua perfectione, exempli causa, aliquis virtuose operatur sine spe præmii, alter vero cum spe præmii, actus secundi non ita virtuosus habetur, sicut primi, quare magis essentialiter præmiatur eo, qui non accidentaliter præmiatur eo, qui accidentaliter præmiatur. eodem quoque modo, qui vitiose operatur, & accidentaliter

ter

ter punitur, minus videtur puniri eo, qui accidentaliter non punitur. Nam poena culpæ maior & deterior est poena damni, & cum poena damni adiungitur culpæ, dimittit culpam, quare non punitus accidentaliter, magis punitur essentialiter eo, qui accidentaliter punitur. Testatur etiam super hoc, quod scribit Laërtius de Aristotele. cum enim interrogaretur Aristoteles, quid ex Philosophia acquisiuisset, respondit, quod vos spe præmiorum facitis, & timore poenæ fugitis, ego ex amore & nobilitate virtutis facio, & ex vitii vituperio fugio. cur autem aliqui præmiantur, vel puniuntur, accidentaliter, aliqui vero non, non est præsentis propositi.

Ad quartum, in quo dicebatur, quod fere totum vniuersum esset deceptum, cum omnes leges ponant, animam immortalem esse. Ad quod dicitur, quod si totum nihil sit, quam suæ partes, veluti multi existimant, cum nullus sit homo, qui non decipiat, ut dicit Plato, in de Republica, non est peccatum, illud concedere, immo, necesse est, concedere, aut, quod totus mundus decipitur, aut, saltem maior pars. supposito, quod sint tantum tres leges, scilicet Christi, Moyfis, & Mahumethi. Aut igitur omnes sunt falsæ, & sic totus mundus est deceptus, aut saltem duæ earum, & sic maior pars est decepta. veruntamen, scire, oportet, quod, ut dicunt Plato & Aristoteles, politicus est medicus animorum, propositum-

tumque politici est, facere hominem magis studiosum, quam scientem, modo, secundum diuersitatem hominum, diuersis ingeniis incedendum est ad hunc finem consequendum. Aliqui enim sunt homines ingenui, & bene institutæ naturæ, adeo, quod ad virtutem inducuntur ex sola virtutis nobilitate, & a vitio retrahuntur ex sola eius foeditate, & hi optime dispositi sunt, licet perpauci sunt. Aliqui vero sunt minus bene dispositi, & hi, præter nobilitatem virtutis, & foeditatem vitii, ex præmiis, laudibus & honoribus, ex pœnis, vituperiis & infamia, studiose operantur, & vitia fugiunt, & hi in secundo gradu sunt. Aliqui vero, propter spem alicuius boni, & timorem pœnæ corporalis, studiosi efficiuntur. quare, vt talem virtutem consequantur, statuunt politici vel aurum, vel dignitatem, vel aliquid tale, vt vitia vero fugiant, statuunt vel in pecunia, vel in honore, vel in corpore, seu mutilando membrum, seu occidendo, puniri. quidam vero, ex ferocitate & peruerſitate naturæ, nullo horum mouentur, vt quotidiana docet experientia, ideo posuerunt virtuosus in alia vita præmia æterna, vitiosis vero æterna damna, quæ maxime terrent, maiorque pars hominum, si bonum operatur, magis ex metu æterni damni, quam spe æterni boni, operatur bonum, cum damna sint magis nobis cognita, quam illa bona æterna, & quoniam hoc vltimum ingenium omnibus hominibus

bus

bus potest prodesse, cuiuscunque gradus sint, respiciens legislator pronitatem viarum ad malum, intendens communi bono, sanxit, animam esse immortalem, non curans de veritate, sed tantum de probitate, ut inducat homines ad virtutem, neque accusandus est politicus, sicut namque medicus multa fingit, ut ægro sanitatem restituat, sic Politicus Apologos format, ut ciues rectificet, verum in his Apologis, ut dicit Auerroes, in prologo 3 Phys. proprie neque est veritas, neque falsitas. sic etiam nutrices inducunt alumnos suos ad ea, quæ pueris prodesse cognoscunt. quod si vir sanus esset, vel compos mentis, talibus figmentis neque medicus, neque nutrix, indigerent. quapropter, si omnes homines essent in illo primo gradu enumerato, stante etiam animorum mortalitate, studiosi fierent, sed, quasi nulli sunt illius dispositionis, quare, aliis ingeniis incedere, necesse fuit, neque hoc inconuenit, cum humana natura fere tota sit immersa materiæ, parumque intellectus participet, vnde magis distat homo ab intelligentiis, quam æger a sano, puer a viro, insipiens a sapiente. non itaque mirum est, si talibus utatur politicus.

In quinto autem principali duo tangebantur, vnum de his, quæ visa sunt in sepulcris, alterum vero de somniis. Ad horum igitur primum dicitur primo, quod multa inter historias connumerantur, quæ tamen meræ fabulæ sunt. Dicitur secundo, quod

in locis sepulcrorum, vt in pluribus, aer est valde crassus, tum ex euaporatione cadaverum, tum ex frigiditate lapidum, ex multisque aliis, quæ aeris spissitudinem inducunt. verum, vt, 3 meteor., cap. de Iride, dicitur, talis aer faciliter recipit idola rerum circumstantium, sicut speculum recipit figuras. quare visa in aere sic disposito a rudibus hominibus existimantur esse res, quæ ibi videntur, sicut pueri, aspicientes in speculo, vel in aqua, credunt, ea, quæ in eis videntur, vere esse ibi. Refert namque Aristoteles de quodam debilis visus, aspiciente in nocte suam vmbra, ipsum existimasse, esse virum, insequentem ipsum. quo fit, vt rudes homines, propter tale accidens, existiment, illa esse animas defunctorum. Adiuuat etiam ad hæc imaginatio & vniuersalis fama. quare, vt refert Aristoteles, in secundo capite de somno & vigilia, multa ab existentibus in timore & aliis passionibus, esto, quod vigilent, existimantur videri quæ tamen non sunt, sicut contingit ægrotantibus. Tertio dicitur hoc multoties contingere, propter illusiones & dolos malorum Sacerdotum, vt legitur Danielis vltimo de Idolo Bel. multi enim Sacerdotes & Templorum custodes quatuor virtutes cardinales commutauerunt in ambitionem, auaritiam, gulam, & luxuriam, & ad hæc vitia omnia alia consequuntur. quare, vt optatis perfruantur, his fraudibus & fictionibus vtuntur, sicut, tempestate nostra aliquando con-

contigisse, scimus. Quarto dicitur, quod multæ Græcorum & Romanorum historiarum mirabilia referant. in ortu namque & occasu virorum, memoria dignorum, portenta apparuisse, certissimum est. Suetonius enim Tranquillus, in libro de duocim Cæsaribus, magna signa, & per aues, & Deorum responsa, & multa alia, narrat. non minus Plutarchus, in libro de vitis illustrium virorum, Virgilius quoque noster, in fine Georg. hæc cecinit,

*Tempore quanquam illo tellus quoque &
æquora ponti,*

*Obscenique canes, importunaque volucres,
Signa dabant. quoties, Cyclopum effervere
in agros,*

*Vidimus, undantem, ruptis fornacibus,
Ætnam.*

*Flammarumque globos, liquefactaque volu-
re saxa?*

Armorum sonitum toto Germania cælo

Audiit, insolitis tremuerunt motibus Alpes.

Vax quoque per lucos vulgo exaudita silentes

Ingens, & simulacra, modis pallentia miris,

Visa sub obscurum noctis, pecudesque locuta.

Infandum, sistunt amnes, terraque debiscunt,

*Et mæstum illacrymat templis ebur, æraque
sudant.*

Non minus multa Lucanus commemorat.

Machabæorum quoque secundo, cap. 5, sic

scribitur. Eodem tempore Antiochus se-

cundam profectiorem parauit in Ægy-

ptum, contigit autem, per vniuersalem Hi-

erofolymorum ciuitatem, videri, diebus quadraginta, per aëra equites discurrentes, auratas stolas habentes, & hastas, quasi cohortes armatas, & cursus equorum, per ordinem digestos, & congressiones fieri comminus, & scutorum motus, & galeatorum multitudinem, gladiis districtis, & telorum iactus, & aureorum armorum splendorem, omnisque generis loricarum. quapropter omnes rogabant, in bonum monstra conuertere. Quare priores responsiones plene euacuare non videntur, talia autem negare, videtur esse magnæ pertinaciæ, & impudentiæ, quapropter aliter dicendum est. Concesso igitur, quod non sint fictiones, aut illusiones, aut nostræ imaginationes, dicendum est, quod Christiani, & quasi vniuersaliter omnes leges, & Plato, & Auicenna, & multi alii, ponunt, hæc fieri vel a Deo, vel per suos ministros, quos Angelos appellamus, si boni sint, si mali, dæmones. verum est, quod aliqua differentia est inter eos, de qua nunc non est cura, isti que simpliciter concedunt, animam humanam esse immortalem, & multiplicatam, vt satis notum est, verum hoc manifeste repugnat dictis Aristotelis, cum nulla sit immaterialis substantia, quæ orbem non moueat. namque, 12 metaph., secundum numerum orbium ponit numerum intelligentiarum, neque est aliquis effectus hic inferior, qui non reducatur secundum eum in primum motum, vt patet 8 phys. & 1 meteor. Amplius, quia
cui-

euidenti ratione naturali hoc, videre meo, monstrari non potest, quare non stabimus infra limites naturales, quod tamen polliciti sumus a principio. ideo Alexander Aphrodiseus, vt refert D. Thomas, in quæstione disputata de miraculis, art. 3 & 10, in corpore quæstionis dixit, hæc prouenire a substantiis separatis, mediantibus corporibus cœlestibus. secundum virtutes stellarum, secundum coniunctiones & oppositiones earum, & vere, si istis effectus conceduntur, secundum Peripateticos, aliter dici non potest, cum mundus totus hic inferior illi superiori sit contriguus, vt inde omnis virtus gubernetur, sicut dicitur in principio meteororum, illud quoque non irrationabiliter videtur dictum. Etenim Alexander tenet, Deum & intelligentiam habere prouidentiam de istis inferioribus, quemadmodum ex eius sententia notat D. Thomas, in expositione 56, tex. 2 de cœlo. Et hoc expresse Alexander ipse confitetur, in libro de fato. quare pro temporum & locorum conditionibus istis inferioribus prouidet, & de regibus, & Prophetis, atque de aliis euentibus. Quod igitur talia apparuerunt aliquando, vt dictum est libro Machabæorum, designabat, bella futura, sicut exitus denotauit, licet fortassis & illa euitari, secundum Alexandrum, poterant, cum ponat, in libro de fato, voluntatem liberam, neque mirandum est, si talia a corporibus cœlestibus figurari possunt, cum ani-

mata sint nobilissima anima, quæque omnia inferiora generent & gubernent. Confimile dicatur de his, quæ Titus Livius, Suetonius, Virgilius, Plutarchus & Lucanus, referunt. Nam, si præcedunt signa veris, ætatis, & aliorum temporum, ut manifestum est, quanto magis illæ intelligentiæ debent esse sollicitæ de natura humana, quod quidem clarissimum est videre. non enim memini, me legisse vitam alicuius viri in quacunque re, nisi in ortu & occasu multa præcesserint, immo, in multis suis actibus, quodque Platonici genium, siue dæmonem, familiarem appellant, apud Peripateticos est eius genitura, quia talis natus est cum tali constellatione, ille vero cum alia, si sine illa multiplicatione dæmonum & geniorum saluare possumus, superuacuum videtur illa ponere, cum hoc, quod illa etiam rationi non consonant. corpora ergo cœlestia, secundum suas virtutes, hæc miranda producant, pro mortalium utilitate, & maxime hominum, cum Diuinitatis humana natura sit particeps. refert enim Aristoteles, 3 de hist. cap. 10, quod in Lemno, insula, ex capri mammis, quas geminas iuxta genitale gerebat, tantum lactis emulxerunt, ut colostrum inde conficerent, cumque dominus pecoris oraculum consuleret, responsum habuisse, amplius incrementum peculii futurum, quod sic fore, compertum est. Si itaque de pecoribus portentadant, quanto magis de hominibus. verum

D.

D. Thomas pluribus subtilibus rationibus hanc opinionem impugnatur. Primo, quia hæc inordinate fiunt, quæ vero a natura fiunt, 2 & 8 phys, ordinate fiunt. Secundo, quia aliqui fiunt effectus in huiusmodi apparitionibus, qui non possunt reduci in corpus cœleste, ut locutiones, & præsertim futurorum, cum ista non possunt fieri, nisi ab habente intellectum, talia autem multoties sunt inanimata, aut intellectu carentia, ut, quod bestia loquatur, vel, in aere voces humanæ sentiantur, vel, aliquid tale. Tertio, quia quædam fiunt, quæ virtute corporum cœlestium fieri non possunt, ut, quod virgæ in serpentes vertuntur. quare nulla videtur responsio. verum mihi hæc conclusionem probare non videntur. Ad primum namque dicitur, quod immo talia ordinate fiunt, &, quoad tempora, &, quoad loca, &, per causas determinatas, quia multi Astrologi sciunt ista prædicere. Et de prodigiis futuris, de statuum mutationibus, & in locis determinatis, sicut visum est multoties, quod autem nobis videantur indeterminata, hoc ex nostra ignorantia provenit. De secundo, tam a **D. Thoma** magnificato, nolo dicere, quod miror, sed, quod ego non recte intelligo. huiusmodi enim effectus & locutiones secundum ipsum fiunt ab intelligentiis quandoque bonis, quandoque malis, &, permissione diuina, quandoque ab animabus humanis, iam a corpore separatis, verum omnia talia non

sunt tunc formæ illorum corporum, siue animatorum, quæ sentiuntur sic loqui, sunt ergo tantum motores. quare igitur intelligentiæ mouentes corpora cœlestia hoc facere non possunt, cum suis instrumentis, quæ tot ac tanta, faciunt psittacos, picas, coruos, merulas, &c. loqui, non video, cur tam aperte ipse hæc negat, præsertim, quoniam, secundum ipsum, quæst. si primæ part. summæ, ponit, Angelum, siue alium, sonum facere per corpus aereum condensatum & figuratum, modo corpora cœlestia per suas virtutes & coniunctiones stellarum hæc & multo maiora faciunt, quia & animalia faciunt, & stupenda, vt patet in lapidibus & herbis, quare & hæc, & confirmatur, quoniam Conciliator, in expositione 26 problematis vndecimæ particulæ, problema est, cur aliqui, cum statim nascuntur, loquuntur, dicit, Haly Eberangel de natiuitatibus hæc scribit. rex noster vocauit nos, eo, quod vna ex mulieribus suis peperit filium, & fuit ascendens 8 graduum libræ, terminus Mercurii, & in ipso fuerunt Iupiter, Venus, Mars, & Mercurius, & conuenit illic vna societas Astrologorum, quorum quilibet dixit suam opinionem, & ego tacui. tunc rex dixit mihi, quid habes, cur non loqueris? Cui respondi, date mihi terminum trium dierum, quia, si filius vester transierit tertium diem, erit de eo miraculum magnum, & cum natus compleuit 24 horas, incepit loqui, & facere signa cum

m m n n

manu, & rex multum expauescit, vnde & ego dixi, possibile est, quod dicat aliquam Prophetiam, & aliquod miraculum, & tunc cum rege fuimus ad puerum, & dixit puer, Ego sum natus infortunatus, & natus sum ad indicandam amissionem regni Agedeir, & destructionem gentis Almanni, hic statim cecidit & mortuus est, & compertum est, vt dixit, modo iste puer vel locutus est per spiritum, vel ex se. non primum, quia Haly per Astrologiam nesciuisset prædicere, quæ dixit, ergo ex se, id est, ab intrinseco, & non per cognitionem, quam habuit ab aliquo homine. Ergo ex virtute intelligentiarum, & corporum cœlestium. quare & in aliis sic potest contingere. Quod si dicatur, omnis doctrina, vel disciplina, sit ex præexistente cognitione, huic dicitur, quod ista non est doctrina, vel disciplina, neque cognitio proprie. Cuius signum esse potest, quod isti vates, cum sunt extra furorem, nihil recordantur, immo, negant, se illa dixisse, sed ab impetu cœlesti mouentur. quare Plato, in Menone, & in plerisque aliis locis dicit, vates quam plurima vera nuntiant, nihil tamen eorum, quæ loquuntur, intelligunt, & lib. 30 problematum, problemate 1, Sibyllæ, & Bacchæ, & omnes, qui diuino spiraculo instigari creduntur, impetu inducuntur. Conciliatorque ibi in expositione dicit, Ego audiui a fideli medico, quod mulier quædam illiterata, dum esset melancholica, Latinum loquebatur congruum, quæ
fa-

sanata, euanuit, quod esse non videtur, nisi ex dispositione corporis cum motu astrorum. Ad tertium vero dicitur, quod Peripatetici dicerent, illas esse illusiones, sicut multi faciunt per alterationem, aut medii, aut oculi, aut, si fuit verum, non sumus in terminis, quia secludimus miracula. Quod autem ulterius adiungebatur de somniis, nos illa maiora concedimus. Auerroes enim, qui non ponit, animas multiplicari, in capite de diuinatione somniorum, illud abunde concedit, & Galenus, qui animam putauit mortalem, immo, multa in medicina habita sunt per somnia, verum hæc non arguunt animam immortalem simpliciter, sed, Deos curare inferiora, quare & per signa in vigilia, & per somnia, multa docent & provident rebus humanis, sicut abunde ibi dicit Auerroes. quod autem dicitur de illis Arcadibus, non est mirum, cum Plato, 5 de repub., dicat, delinquentium in peregrinos Deus est ultor, quod autem de Pamphilo adducitur, ille Apologus est, ad retrahendum ciues. Cur autem aliqui relinquuntur impuniti, vel remunerati, aliqui vero e contrario, non est præsentis considerationis, & multa pulchra & difficilia ibi tangit Commentator, quæ non sunt pro nostra intentione.

Ad sextum vero, de Dæmoniacis, potest per hæc, quæ dicta sunt, responsio patere. Nam omnes tales, aut atra bili vexantur, aut extasim patiuntur, aut morti proximi,

alie-

alienique ab humanis cogitationibus, quo fit, vt quasi inanimati & irrationabiles fiant, propter quod motus cœlestes recipere possunt, magisque aguntur & ducuntur ab impetu lymphatico, quam agant, vel ducant. Cuius euidentissimum signum est, quoniam, vt dicit Plato, & Aristoteles consentit, non intelligunt, quæ dicunt, verum, veluti bestię, ab alio mouentur. vnde in prouerbio est, pueros & stultos prophetizare, at sapientes & sui compotes ab huiusmodi alienos esse, neque de hoc aliquis mirari debet, quandoquidem Aristoteles, 9 de hist. cap. 31, sic scribit, tempore, quo apud Pharsala hospites Mediæ periire, corui locis Athenarum Peloponnesique defuerunt, quasi sensum haberent aliquem, quo inter se rerum euenta significarent & mouerentur. Si enim corui talia futura ex cœlo senserunt, cur non & homines, parum a coruis distantes, cum minime habeant de intellectu. consideret igitur, sic obiiciens, bestias, a quibus & augures sumunt sua præsagia. quod vero augurandi ars non sit penitus vana, Græcorum & Romanorum declarant historiæ, instituitque Plato, lib. de legibus, in ciuitate, recte ordinata, augurandi artem non esse præmittendam. Aristoteles quoque 1, de hist. cap. 16 & 9 eiusdem, cap. 1, nonnulla commemorat de arte augurandi. Quod si aues, multaque ratione carentia, indicare possunt, ex cœlestium impressione cur non & homines, illis similes, quod etiam

iam

iam firmatur, quoniam aliter Astrologi tam certe iudicare non possent, sicuti visum est, nisi virtutes cœlestes in hæc inferiora imprimerent. quod si aliquando mentiri videntur, hoc est, quoniam vel imperiti sunt, vel non recte genituram acceperunt, vel ex libero arbitrio, dominante cœlestibus, illud contingit.

Ad septimum vero dicitur, quod minime Aristoteles sensit, animam post mortem remanere, verum oppositum, &, ad illud, 1 Ethic., satis patet, cum dicat, neque prodesse, neque nocere, eis, cum nihil sint, sed tantum existimationi, quæ de eis habetur. quale esse Homerus in mente habet, tale esse enim & mortui habent. Ad illud, 2 œconom., dicitur, quod vel a Diis mulieres illæ meritæ sunt in vita (non enim ibi dicitur post mortem) vel, si post mortem intelligitur hoc, quantum ad existimationem, quæ habetur de eis, vel, ut inducat alias mulieres ad consimilia opera.

Ad octauum vero & vltimum, in quo dicebatur, viros impuros & flagitiosos, suorumque scelerum conscios, asserere animas mortales, & sanctos iustos, immortales, ad hoc dicitur, quod neque vniuersaliter viri impuri ponunt mortalitatem, neque vniuersaliter temperati immortalitatem. Nam manifeste videmus, multos prauos homines credere, verum ex passionibus seduci, multos etiam viros sanctos & iustos, scimus, mortalitatem animarum posuisse.

Plato

Plato namque, 1 de repub., dicit, Simonidem, Poetam, virum diuinum & optimum fuisse, qui tamen eam mortalem asseuerat. Homerus quoque, vt Aristoteles, 2 de anima, refert, existimauit, sensum ab intellectu non differre, quæ autem fuerit Homeri dignitas, quis ignorat? Hippocr. quoque & Galenus, viri doctissimi & optimi, huius perhibentur opinionis, Alexander Aphrodis., magnus Alfarabius, Abubacher, Auenpace, ex nostratibus quoque Plinius Secundus, Seneca, innumerique alii, hoc sensere. Seneca namque, lib. 7 Epistolarum ad Lucilium, epist. 54, quæ incipit, Longum mihi comitatum dederat mala valetudo, manifestiusque in de consolatione ad Martiriam, affirmat, ipsam esse mortalem, multosque alios studiosos & viros doctissimos, connumerat, eiusdem opinionis fuisse, & hoc ideo, quoniam, solam virtutem, existimauerunt, esse felicitatem, vitium vero miseriam, ceteraque alia bona neglexerunt, nisi, quantum virtuti deseruiunt, quæque virtuti obstant, a seipsis eiecerunt, existimandumque est, multos viros sensisse animam mortalem, qui tamen scripserunt, ipsam esse immortalem, sed hoc fecisse ex pronitate virorum ad malum, qui parum, aut nihil, habent de intellectu, bonaque animi non cognoscentes, nec amantes, tantum corporalibus incumbunt. Quare huiusmodi ingeniis necesse est, eos sanare, sicut & medicus ad ægrum, & nutrix ad puerum.

rum, ratione carentem, se habent. per hæc
 ut puto, & alia, solui possunt. nam, quod
 communiter dicitur, si anima est mortalis,
 homo deberet totum se tradere voluptati-
 bus corporalibus, omnia mala committere,
 ad sui utilitatem, vanumque esset, Deum
 colere, diuina honorare, preces ad Deum
 fundere, sacrificia facere, ceteraque huius
 generis, satis responsio patet, per ea, quæ
 dicta sunt. nam, cum naturaliter felicitas
 appetatur, & miseria fugiatur, & per dicta
 felicitas consistat in actu virtuoso, miseria
 vero in actu vitioso, cum, ex tota mente De-
 um colere, diuina honorare, fundere ad
 Deum preces, sacrificare, sint actus maxime
 virtuosi, ideo debemus totis viribus inniti
 ad acquisitionem istorum, e contra vero
 furta, rapinæ, homicidia, sunt vitia, quæ fa-
 ciunt transire hominem in bestiam, ideo ab
 iis abstinere debemus, & animadvertas,
 quod studiose operans, & non expectans
 præmium aliud a virtute, longe virtuosius
 & magis ingenue videtur operari, quam
 ille, qui ultra virtutem præmium aliquod
 expectat, quique fugit vitium ob turpitu-
 dinem vitii, non ob formidinem pœnæ de-
 bitæ pro vitio, magis laudandus videtur,
 quam, qui euitat vitium propter timorem
 pœnæ, iuxta illud,

Oderunt peccare boni, virtutis amore,

Oderunt peccare mali, formidine pœnæ.

Quare perfectius asserentes animam mor-
 talem, melius videntur saluare rationem
 vir-

virtutis, quam, asserentes ipsam immortalē. spes namque præmii, & pœnæ timor, videntur seruitutem quandam importare, quæ rationi virtutis contrariatur.

Pro complemento huius opinionis, sciendum est, quod, quemadmodum docet Aristoteles, in libris de gener. anim., natura gradatim procedit & ordinate, ita, quod non coniungit immediate extremum extremo, sed extremum medio. videmus enim inter herbas & arbores mediare virgulta, inter vegetabilia & animalia esse animata immobilia, vt ostrea, & cetera eius generis, & sic ulterius ascendendo, quod & beatus Dionysius, cap 7 de diuinis nominibus, insinuat, cum dicit, quod diuina sapientia coniungit fines superiorum principiis inferiorum, homo autem, vt dictum est, perfectissimum est animalium. quare, cum inter materialia anima humana primum obtineat locum, coniungetur ergo cum immaterialibus, mediaque est inter materialia & immaterialia, medium vero, comparatum extremis, dicitur alterum extremorum, quare, immaterialibus comparata, potest dici materialis, &, respectu materialium, immaterialis, neque tantum istas denominationes meretur, verum & de proprietatibus extremorum participat. nam viride, comparatum albo, non solum dicitur nigrum, verum & congregat visum, sicut & nigrum, licet non tam intense. quare & anima humana habet de proprietatibus intel-

ligen-

ligentiarum, & habet de proprietatibus
 omnium materialium. quo fit, vt, quando
 exercet opera, cum quibus conuenit cum
 intelligentiis, dicatur diuina & transmutari
 in Deo, quando vero exercet opera bestia-
 rum, dicitur transmutari in bestias. nam ex
 malitia dicitur serpens, vel vulpes, ex cru-
 delitate tigris, &c. nihil enim est in mundo,
 quod, ex aliqua proprietate, non possit
 conuenire ipsi homini. quapropter non im-
 merito homo dictus est Microcosmus, seu
 paruus mundus. grande igitur miraculum
 quidam dixerunt esse hominem, cum totus
 mundus sit, & in vnamquamque naturam
 vertibilis, cum sibi data est potestas sequi,
 quamcunque proprietatem rerum malue-
 rit. Recte igitur apologisauerunt Antiqui,
 cum dixerunt, aliquos homines esse factos
 Deos, aliquos leones, aliquos lupos, ali-
 quos aquilas, aliquos pisces, aliquos plan-
 tas, aliquos saxa, &c. cum aliqui homines
 insecuti sunt intellectum, aliqui sensum,
 aliqui vires vegetatiuæ, &c. Quicunque er-
 go præponunt voluptates corporales vir-
 tutibus moralibus, siue intellectiuis, magis
 faciunt bestiam, quam Deum, qui diuitias,
 magis aurum. quare illi bestię, isti insensa-
 ti, appellandi sunt. non igitur, existente
 anima mortali, virtutes sunt spernendæ, &
 voluptates prosequendæ, nisi malit aliquis
 esse bestia, quam homo, & insensatus, quam
 sensatus, seu cognoscens. Scire tamen, oportet,
 quod, quantumcunque homo sic de

mate-

materiali & immateriali participet, tamen proprie dicitur immateriali participare, quia multum deficit ab immaterialitate, sed non proprie dicitur brutis & vegetabilibus participare, verum ea continere. nam infra immaterialia est, & supra materialia, quapropter non potest ad perfectionem immaterialium deuenire. vnde neque dii appellati sunt, sed diui, vel diuini, verum nedum potest æquare se homo bestię, immo, bestiam superare. nam quidam homines longe crudeliores quacunque bestia existunt, dicente Aristotele, 7 ethic. Malus homo decies millies peior est bestia, & sicut dictum est de crudelitate, ita dicatur de reliquis vitiis. Cum itaque tam sordidum sit vitium, tam iniqua sit hominis vitiosi vita, e contra vero de virtute, quis igitur, existente etiam anima mortali, magis eligeret vitium, quam virtutem, nisi mallet esse bestia, seu deterior bestia, quam homo, quare &c.

In quo ponitur ultima conclusio, in hac materia, quę, sententia mea, videtur indubie sustinenda.

CAPVT XV.

His itaque sic se habentibus, mihi, saluā saniori sententia, in hac materia dicendum videtur, quod quæstio de immortalitate animę est neutrum problema, sicut etiam de mundi æternitate. mihi namque videtur, quod nullę rationes naturales adduci possunt, cogentes, animam esse immortalem,

talem, minusque probantes, animam esse mortalem, sicut quam plures Doctores, tenentes eam immortalem, declarant. Quare nolui ponere responsiones ad alteram partem, cum alii ponant, & præcipue D. Thomas, luculenter, copiose & grauiter. quapropter dicemus, sicut Plato, 1 de Legibus, certificare de aliquo, cum multi ambigunt, solius est Dei. cum itaque tam illustres viri inter se ambigant, nisi per Deum, hoc certificari posse, existimo, non videtur autem esse decens, neque expediens, hominem tali certitudine carere. si enim in hoc ambigeret, incertas & sine fine aliquo actiones haberet, quandoquidem, sine ignoto, &, quæ ad ipsum finem sunt, ignota esse, necesse est. unde, si anima est immortalis, terrena despicienda sunt, & æterna prosequenda. At, si mortalis existat, contrarius modus prosequendus est. quod si alia ab homine suos fines determinatos habent, quanto magis homo ipse, cum homo perfectissimus mortalium sit, solusque, vt Plato, in de Republica, dicit, Deum colat & iustitiam. quapropter dico, quod ante donum, vel aduentum, gratiæ, multifariam, per Prophetas & bona supernaturalia, hanc quæstionem Deus terminauit, vt manifeste per vetus Testamentum est videre, nouissime autem per Filium, quem constituit heredem vniuersorum, per quem fecit & secula, eam quæstionem dilucidauit, sicut scribit Apostolus, epist. ad Hebræos. Quod autem ille sit

vere

vere Dei Filius, verus Deus, & verus homo, apertissime & sine dubio lumen Christiani nominis, D. Thomas, in primo contra Gentiles, cap. 6, declarat, quæ Ioannes Scotus, omnium, sententia mea, subtilissimus, virque in primis religiosissimus, ad numerum octonarum redigens, enumerat, in prologo libri sententiarum. etenim tam aperte illa octo illud declarant, vt, nisi mente priuatus, aut pertinax, negare posset. Cum igitur ille verus sit Deus, ipse solus vere est lux, per quam omnia videntur, vt Ioannis 1, ipseque etiam solus est veritas, per quam cetera vera sunt, vt Ioannis 14, Ego sum via, veritas, & vita. verum, cum ipse manifesta-uerit verbo, & opere, animam esse immortalem, verbo quidem, cum malis minatur ignem æternum, bonis vero vitam æternam promittit, dicit enim, Venite benedicti Patris mei, &c. & subsequitur, Ite maledicti in ignem æternum, &c. opere vero, cum tertia die resurrexit. verum, quanto lux distat a lucido, & veritas a vero, &, quanto causa infinita est potior effectu finito, tanto efficacius hoc demonstrat immortalitatem animæ. quare, si quæ rationes probare videntur mortalitatem animæ, sunt falsæ & apparentes, cum prima lux, & prima veritas, ostendant oppositum, si quæ vero videntur probare eius immortalitatem, veræ quidem sunt & lucidæ, sed non lux & veritas, quare hæc sola via inconcussa & stabilis est, ceteræ vero sunt fluctuantes. Præ-

... Augustinus,
Irenaeus, Ambrosius, &c. preterquam,
quod naturalium cognitionem, diuinorum
etiam habuerunt, quia, vt ait Hieronymus,
hoc doctus Plato nesciuit, hoc eloquens
Demosthenes. verum, quis, nisi insanus, ma-
gis crederet infidelibus, sic dispositis, quam
Christicolis, tam bene dotatis, mihi que il-
lud firmam fidem facit, quod Augustinus,
mea sententia, nulli in doctrina secundus
(etenim minorem Platone & Aristotele non
existimo) Christiani nominis primo inimi-
cus, tam integerrimæ vitæ factus, in fine de
ciuitate Dei, scribit, tot se occulta fide vi-
disse miracula, quæ intemeratam, inuiola-
bilem & firmissimam, fidem ostendunt,
Greg. quoq; Papa, cuius in doctrina & san-
ctitate conferendus, tot & tanta in Dialogis
adducit, vt omnis prorsus ambiguitas re-
moueatur. quare indubie, ipsam immorta-
lem esse, asserendum est, verum non ea via
incedendum est, qua huius seculi sapientes
incesserunt, qui, cum sapientes se dixerunt,
stulti facti sunt. quisquis enim hac via pro-
cedet, vt existimo, semper incertus & vagus
fluctuabit. vnde credo, quod, quantumcun-
que

11

...



